



08054

漁石集卷之三

明唐 龍撰

郡後學胡鳳丹月樵校梓

雜著

月塢癡人問答

黔有士棄其業毀其冠服卽月塢以居號癡人俾人呼之人呼以癡人甚然應名稱字喁喁若不答俗曰進士公進士公蹙焉避之時夢漁子兀坐癡人見不識也問爲誰曰癡人夢漁子曰是月塢癡人歎曰然夢漁子曰異異哉夫無慧與無所於用之謂癡世方病是而逃之懼及之癡人乃樂弗去而今癡人之癡可知也接輿歌者其失狂植杖耘者其失固癡人其此類也夫癡人曰吾癡矣不知云何夢漁子曰南山有

卷三

漁石集

退補齋

木托根千仞之壑草翳木蔽而石覆焉則槁則薪矣旣材於匠氏斧斤尋焉青黃而文之乃清廟之器明堂之具也君子用則其材也不用則其薪也癡人何居曰吾不能爲薪也夢漁子曰陰闔而陽舒者天之法也靜含而動光者聖人之用也癡人聞天之機不顯乎氣不噫乎日月不照臨雷霆不鼓舞乎抑聞尹終莘乎望槁於磻乎孔不栖栖孟悻悻乎夫聰明智辯察物之形裁成揆叙立政之經古之君子皆然乃由其道去其智利其用蔑其敎曰吾癡吾癡無乃矯歟癡人默焉若寤焉曰然則君子無癡乎將放濁乎和光乎波之同體之噉乎夢漁子曰已矣君子亦有癡焉禮以正身身以殉道道以立政政以匡時人巧我拙人辯我訥人諾諾我諤諤焉

若矢魚之直也甯武子之愚也讓之啞也黷之慙也而皆所謂癡也殆智全而義正功著而德無闕者也視癡人則何如癡人曰忘世者固徇時者隨酌於道而出之者中吾之癡瘳矣然而君子之癡方塞吾慧室吾機矣吾毋改吾之癡人竊觀吾君子不慧不達物落落世齟齬焉癡殆甚請亦曰癡人

紀綱錄引

是惟正德十一年龍巡按雲南會太監崔和鎮守金騰路大違於民乃遏其所爲縛其羣從而聲其罪狀於朝和側目切齒而未已也既十五年巡按江西十六年夏和亦來鎮守禁之如雲南且請諸朝乞罷之龍離江西四年於斯矣和果不能忘乃挾奏以爲數年禁其欲而不得肆思所甘心焉夫當

卷三

漁石集

二

退補齋

是之時豈不虞其且反噬哉重念國之紀綱不可廢也斯民之殃不可縱也直抗焉而當之矣昔韓韶開倉賑饑民人爭謂不可韶曰長活溝壑之人而以此伏罪含笑入地矣龍何憾焉仰惟聖天子在上明見萬里則又龍之至幸至幸也

題兩疏後解

嬖人錢寧雲南臨安人太監錢能鎮守雲南收爲家人年十五六性機警雲南衛指揮盧和充錢能門下頭目和善相一見寧謂將來必大貴顯私結無不至諸服用俱出於和寧拜和爲義父後和陞金齒參將挾讐勘四平人死以火鍛其屍又強奪生員妻事發問斬罪既錢寧竊柄乃爲和奏辯下鎮巡會勘和得脫刑具散居都司直房正德十一年審錄官至

寧陰囑出和之死且令奏事承差楊金齋書於察院龍當堂裂而還之曰和詐爲耳審錄官果欲未減和范巡撫沐總兵史鎮守聞之愕然三司杭東卿朱升之輩曰有巡按在無憂也審錄官語龍曰盧和事皆無屍當未減龍折之曰四人無屍蓋和鍛之以滅其跡耳若得未減則天下酷吏紛然鍛人之屍矣吾實不能今日未減之雖富貴立至恐人云徇錢寧之意縱盧和之獄其將謂何審錄官氣沮龍喝皂隸輩將和曳於階下加刑具允以常刑送按察司獄撫總諸公輩亟稱曰中流砥柱然自此寢不帖席矣至鳳朝明事又危矣朝明被奏許不得襲令惡從劉宣董薄載金寶于京師厚賂錢寧不啻二十萬寧以言脇總兵鎮守又寄語巡撫曰但了武定

卷三

漁石集

三

退補齋

事便請往兵部朝明又賄諸勘官文案具矣龍至巡撫首以此會龍不可駭還其封客有爲朝明說者游揚其辭卒乃曰道長真難得鳳家持萬金伺半年竟無門可入龍正色曰卽十萬直一芥耳斯言何爲至于我其人慙而去朝明哀求於寧寧令劉宣董薄集雲南人在京者冒爲通把騰詞舉保得內批襲知府寶寧詐爲之也部檄下行按察司時沈仁夫爲按察使查照土官真犯死罪事例將朝明拘繫仁夫真丈夫也龍備鳳氏及朝明罪惡與不當襲狀執奏於朝雲南諸司與軍民人人危之蘇天秀爲驗封郎以大義奏覆詞氣凜然今猶可想見得旨朝明仍降土舍一方之刑威正矣此身極危不敢顧也楊侍御用之雲南刷卷回武功與康德涵太史

道其事德涵性剛直嘆賞不已龍督學事陝西會德涵首詢
曰御美官揮萬金吾子也夫龍謝不敢尋爲題兩疏後以相
遺兩疏蓋指兩事實鳳朝明一疏盧和事得徑行未嘗有疏
云

合尹贈言

東陽蔣子瑜舉進士第崇志邁行奮勵事功既授鄱陽令若
有憂色然予問之曰子戚然夫亦懼其難乎蔣子曰然今之
稱能吏者才之健也知之微也法之密也而吾皆不能是用
以懼予曰斯三者果君子之所望子者乎非也竊聞當官之
要清爾慎爾勤爾是則君子亟爲從政者望而皇皇焉者也
何也謂其可能也謂其取足于我而無待乎其外也夫人在

卷三

漁石集

四

退補齋

能有不能曰清與慎與勤則夫人而能之曰不能者自棄者
也是故吾不彰賂斯清矣吾不敗度斯慎矣吾不忘事斯勤
矣求之則得舉之則勝持之則固卽執塗之人而責之乎是
苟有志焉斯亦至乎爾能者厚責之不能者勿強命焉夫矣
哉君子之公也今夫健若才微若知密若法赫赫然以震耀
于時亦榮矣然喜功耗治才窮於健尙察傷化知困於微張
禁殘民法弊於密其害可勝道哉子之不能又何懼焉子行
矣清可能乎慎可能乎勤可能乎曰能吾亦曰子能清則德
深慎則禮興勤則政舉君子樂之焉爾矣予於是大有感焉
仕以事君也以治民也以行吾道也今之有司然乎哉沒沒
然貨者多矣夫違眾獨立志之辨也挽今於古行之卓也敢

不於是行也卜之

觀泗州續志

泗州志乃知州汪應軫爲之判官侯廷訓又益以帝迹官師政賦禮教災患詞翰六者昔稱闕遺而今備矣嘉靖七年夏五月初吉有事泗上知州袁淮偕判官贖而取正焉將非重職方之教乎諦觀之曰大哉帝迹乎實惟天啟聖神而王業是基不可不大書特書者也官師明則臧否式昭而勸懲之義公矣曰政賦曰禮教曰兵防周禮具載曰災患春秋必書不遺皆是也政賦志復哀舉四事十害而三致意焉有味哉予安得聚羣有司於堂之下出肺肝竭唇吻而徧語之俾各以四事自勉而仁而廉而公而勤師師然稱吏之良也抑且力去其所謂十害者斷獄無不公聽訟無不審囚繫無淹延無慘酷用刑無汎濫追呼無招引告訐無重疊催稅無科罰取財無縱吏下鄉無低價買物吾民斯有瘳矣此尤肯綮者也乃若詞翰則鋪張聖製以顯忠諫以儆有位誰曰不可他有作者惟夫風教與政體與吏習與民隱而有闕焉斯亦錄之苟扞格于是數者卽洪辭廣調直遺之焉爾矣夫事舉其要言刪其煩斯固志法乎盍慎圖之

遊慈恩寺題碑

嘉靖三年九月之八日涼風警野佳節協令布政使劉思賢按察使袁擯參政潘埴楊叔通副使唐龍張宏僉事周鎬姚文清桑溥李孟旭都指揮使張鎬汪麟在公旣暇卜晝惟期

乃燕集于慈恩寺衣冠萃止禮義暢懌弔曲江之遺跡望錦
京之舊基蓋均勞逸之性宜憂樂之序慨興廢之形者不可
不謂之深也勝會匪偶同寅有徵於是乎勒石而旋

忠文公像贊跋

於虜此吾婺忠文公之像也會□元訖運殘孽梁王者負滇
以阻聲教公扶命而南俾自圖乃迄弗悔禍死之城南有祠
子紳奉遺像藏焉正德丙子龍小子按茲土謁祠拜像栗然
之光浩然之氣儼若存者歔歔者久之懼歲月彫滅將無傳
乃託諸石以方正學先生贊附其上寘于祠之窆昭幽微觀
久遠也昔張敬夫贊武侯像而意義獨至論者謂知武侯心
事於虜先生知公之心矣哉

卷三

漁石集

六

退補齋

忠節公像跋

龍旣刻華川像乃忠節公無傳焉提學杭子淮公里人也欽
厥遺烈卽塑像刻之寘於華川右俾並峙嗚呼公死百年餘
始列祠土木之迹不□肖哉雖然忠功義色乃儻然在過者
肅肅然抗厥膺焉君子曰可以觀矣興矣姑取大焉肖不肖
勿論也已

表忠傳

正德己卯夏六月十有四日江西寧邱宸濠反守臣都御史
孫子燧副使許子達參議黃子宏總儲戶部主事馬子思聰
皆死之唯是孫子撫茲土視民若子治民之事若家然鮮於
惠不繫於刑民咸懷之實望也許子初爲山東樂陵令禦寇

有大畧總路上其功授齊地僉事尋列今秩時濠持權利制誘境內諸守臣許子每務違之又縛其黨禁其爲惡修怨于濠望且仇也故反之曰諸所守臣咸在濠首致孫子俾從已孫子曰天無二日不穀無二君勿愛死次者及許子厲聲曰予惟有赤心亟往而刑爾豈從反乎濠怒喝武夫曳二子赴市劫之跪許子益立孫子故仰卧遂皆遇害日方燿倏黜焉無光城中男女無不流涕濠盡執他守臣及馬子黃子于獄以索繫之馬子曰嗟乎惡用是生爲絕弗食越三日死矣黃子憤憤乃引繫索以蹙其頸亦死嗚呼孫子許子不可加矣馬子黃子亦難哉夫大節同者不拘小異至德合者不徇微迹四子雖死有遲速身有執弗執首領或割或不割要皆同

卷三

漁石集

七

退補齋

於能死而已其餘不必竊竊論也故杲卿罵而磔龔勝餓而殞巡先殺遠後亡君子不敢有軒輊者豈非以能死者皆足賢乎嗚呼士於君猶女於夫終身勿易焉滅義求活故持二心乃禽獸之道夷狄之行春秋所謂賊也四子免夫吾知其地下皆得與杲卿諸賢遊矣

聽庵先生傳

聽庵先生姓鄭氏名錡初字湘之改威甫而以威甫行龍母太淑人乃先生女故龍自孩提卽隨先君吏部侍郎以事先生且舅氏北園大夫又恒以先生之德與學與善行與嘉言訓諸龍而未已則知先生復有如龍者乎先生父長史公履方茹潔軌於大義沒時先生方九歲哀毀行成人之禮孝出

至性然也既長家貧窶孜孜兀兀刻勵學問冬夜爐火弗具每擁衾燃油手縮羣書口誦心維達旦弗就枕是固德性以勝其晏安爾曰外大母王夫人恒以是勸龍學故知之今之儒生亦能是乎先生每拂膺舉子業聞豐城宿儒丁公秉英克明性理之學乃請於母邱夫人括田僅十餘畝盡鬻而得資挾以從丁公游日所論難者誠敬以立本察識以辨幾擴充以致用操存以執德涵養以定性先天後天以窮化有要哉丁之學大者沈潛義理故及門之士雖多聰明才辯皆弗許惟於先生以斯文望焉居三年先生歸乃與楓山文懿公連舍而居更相師友辨析疑難明炳洪纖切劘德行動曰邁古至於文字勘磨抑又未哉由是二先生之名重於四方學

卷三

漁石集

八

退補齋

士從者彬彬然金華易學始大倡矣蓋二先生根據六經博綜子史而尤深於易焉耳文懿公掄魁躋華奮庸於時先生乃弗利有司迹落落然而益奮曰予非爲程有司而學也則焉能予困成化戊子乃登鄉薦卒業太學祭酒邢公讓校六館士以賢闕賦籍籍數千人先生裒然居首焉邢公出賦懸示六館偏呈在延公卿咸曰是固賢士乎今讀其文猶洒然有浴沂風雩之意乙未登謝遷榜進士除靖江令專務以平易立政以德教導民幸民弗犯法偶有犯者輒蹙然於色尤惟喜無訟牒至庭以理喻之而已訓人力本業習耕織逐末者則務抑之崇明縣流民三十餘口泛海種田風颺其舟至靖江瀾港司禁武弁誣爲海賊案具而以聞于縣先生按其

賊仗惟耒耜笠罇爾曰是豈盜耶乃多方辨之其寃立白三十餘口賴以活雖然先生長者所長活人豈惟是特其至著者爾會監司行縣暴刑威弗悅先生之政欲加以非禮先生拂衣而出檄封其印而納之曰予自茲隱矣監司愧謝而留先生先君每語龍如此云六年政成執邱夫人喪而歸羣老稚欷歔啼泣若失慈母然至勒像於石戶各模印尸而祝之先生平日事邱夫人至孝凡得珍味夫人未食則不食在公弗獲一稱壽乃自爲像跽而拜若捧觴之狀者函獻以樂夫人之心是亦無所不用其至哉至是葬祭祥禫一弗愆於禮雖年五十有奇而致毀若少壯人既卽吉憮然曰吾仕養親而今弗逮於養何以仕爲北園舅氏方舉進士乃命代奏

卷三

漁石集

九

退補齋

書以致官政超乎泊乎而弗以爵祿滑其心文懿公稱先生爲彭澤流亞豈非以其脫蹤爵祿則同乎抑弗折腰督郵與庭抗監司之嫚遐風勁氣尤有契焉者乎先生厭舊居逼于市廛乃徙慶成橋之北枕岡臨流而築室焉以游以息益玩于理從游者日集龍十歲挾策與年長學士共侍側每聽先生講論窮造化叙彝倫蹟事物辨制度證古今猶山居者之言山一草一木一巖一壑罔不肆陳聽之者發乎其胸說乎其心油油然入之也一日講孟子班爵祿章龍偶嬉笑怒曰小子弗聽乎呵令覆說而無遺舛乃欣欣如初凡作詩文兀然危坐定慮沈思既而伸紙運觚滔滔不倦理澤焉詞炳焉若春雲行空卷舒自若水流地中一瀉而止文之至也時

校諸生文輒許龍曰兒奇才其勉之言猶在耳而龍顧碌碌若是也已先生每曰凡辨理須濯去舊見以來新意又曰作文要典淺顯是足以爲工口耳習艱深者之警矣又作三才一貫圖以太極之理根乎心謂之內謂之本散見于天文地理人事流行于修己治人贊化謂之外謂之末內外以相承本末以相因固先生之學也先生允務篤厚倫理修飭行誼脫畧涯分事二兄曲盡其道欲分所有則奉以周旋攘之亦勿較詬詈詛毀笑而愛之而二兄亦卒紓其歡心少弟知所敬事而先生友之彌至旣耄恒怡怡然每念丁公輒泫然乃爲木主歲時一酬焉厚之道也正德中龍行部江西祀公於鄉賢祠訪其子弟而撫摩之殆承先生之意爾何御史舜賓

卷三

漁石集

十

退補齋

先生故人爲鷺吏囚繫過蘭谿鷺吏氣焰薰灼藩臬諸司畏之弗敢伸理舜賓先生奮顏送於百里外助以銀米相泣而別且爲書數鷺吏先生勿忤害人朝與人有忿而夕卽忘之雖怒其父而其子有善則喜田夫野老至賤也亦款款與語而忘倦北園舅氏爲長洲令以直道忤要路遷爲楚雄府倅尋乞解職而還先生喜大書于堂曰堂前舊樂存三釜門下新春見兩人舅氏優焉游焉獲侍先生以修菽水之職者垂二十餘年卽曰賢哉二大夫可也先生壽考八十九以疾終於寢東湖道卿爲行狀而誌銘乃文懿公撰焉文懿公儼然天儒言垂世則道卿篤行君子絕無阿私是可以不朽矣論曰積厚者發光其耕澤澤其穫粟粟理固然也先生積猶謂

不厚乎發於其身而乃弗究其用又發於子而亦猶弗究其用君子若有遺憾焉然世濟厥美並享大耄齊令名至矣況諸曾孫克承詩書之教蔚乎而未艾焉者乎

野江傳

野江處士豫章人名法姓舒氏太史芬之父也正德戊寅乘輿西狩太史曰殆矣殆矣昔臣落裾斷鞞血汙車輪者獨非人乎首上書諫沮因而和者數百人人皆曰直哉太史已卯秋復議辛留都維濠實包藏禍心將浮江逞焉太史曰事急矣吾何愛吾身復率諸同列詣闕下披誠瀝血指畫利害極其剴切語侵諸左右遂下獄謫提舉海船明年處士沒於家太史徒跣而歸哀毀若弗能生踰三月堊而封樹之執東洲

卷三

漁石集

上

退補齋

子所爲銘泣以示予乃知處士平日敦孝理崇義尙輯禮容嗜欲不汙其素履有過人者可謂古之逸民非邪先是太史奏名處士貽書曰爾有家而今不得而私之有身不得而有之朝夕圖所以答君之貺哉文山氏一峯氏爾其無忝故太史勁忠直節號乎凜乎天下竦焉想聞者處士之教也夫野江在大江之南盱臨二河經流于斯以會於大江大江溢復還而注之得水之勝處士家於上游因號焉凡所爲詩曰野江集論曰唐虞三代同風之德故人人君子戶可封焉既世氏變遷日趨日下幸而深山廣澤之內其民居居其風狂狂不貳之老猶有頽然存者野江殆其人乎今制行部者得舉山林隱逸以聞野江沒矣斯典弗逮吾故發其潛德表其行

義毋令晦焉

惡人傳

浪穹書手張奉習刀筆熟知境內田賦戶口其術能使連阡陌者空其籍無立錐之家籍輒盈焉境苦其毒不敢言朝言而夕賦至矣奉尤工剝民之術境長吏至召問之刺刺與語既執手以歡終乃蹟指惟命焉日教長吏窮取吾民長吏有其三七往奉家人號曰翼虎室呼之予廉其狀驅武豪縛之械至於途厚賂縛者不許乃計逸去縛者追及之力弗能制時野無雲號然雷霆於東奉斃於西腹若剖五藏若刳人厭弗收狗彘棄焉楊子南金賀予曰奉之惡盈其貫御史之威能制惡天代殛之穹人茲生乎嗚呼惡果不可爲也哉奉以匹夫而搖毒於境民懼焉吏制焉將謂終身無刑也卒乃吏縛其軀天顯其誅獸不食其餘嗚呼惡有懼矣

吉慶傳

宏治中中侍吉慶守金齒路從者盡京師惡少慶布各從負械持梃括民之貨民懼竭廬以奉無遺錙銖郊保若掠戶有寇憂慶聚羣貨賞各從之能不知民之蕩神之怒已也貨多石產也擇慶石之美者積以隨籍羣貨於室晝夜守焉各從積伺室窺罔獲已利日謀所以死慶會慶病渴各從禁水漿弗與私賂診者進金石以甚之慶燥極呼所親信從出積之石易水以活從得石馳慶突地而號髮焦膚裂吃吃死各從密其喪假進方物載室之貨以逃屍蛆無收之者踰月官司

卷三

漁石集

三

退補齋

播搗瘞於途過者詈之夫貨災之本也聚貨死之道也象齒猶焚其身人滋甚方慶放於貨惟懼不盈乃嚴刑要之既盈矣藏以室積謂寵可固節鉞老焉乃卒以自焚蛆不就木傳曰不仁者以身發財慶不仁也夫童子歌曰豺之室兮民之廬蛆兮蛆兮磔爾軀夢漁子聞之曰怨哉人慎德焉毋或如守臣慶逞其不仁浚民速死

棠陵像贊

此爲誰人皆曰方子棠陵也夫掀髯瞑目廣額迅眉棠陵之貌夫人知之夫洞乎虛執乎不隨視民之瘠惘乎若身之癯波腹逆鱗以逢萬乘之怒蹇蹇然敢忘其軀棠陵之心知者誰歟嗚呼予知之矣造化裔名棠陵博取勿讓則孰不爭士

卷二

漁石集

三

退補齋

嫉材棠陵思若泉筆若風雨則孰不忌况率山林之性以處一世吾人睢睢盱盱矣不知也何尤世多君子而棠陵獨愛予言豈非以鮑叔知我乎曰棠陵吾將晦其用以息其爭養其明以消其忌雖然山林之性吾不可易矣而睢睢而盱盱將終身哉

仁壽篇

或問曰天下之善皆可以壽何必仁漁石子唐龍應之曰壽者福之至也仁者德之至也詩曰萬有千歲眉壽無有害惟仁然後無害惟無害然後壽松栢生於深山沃雨露之膏被日月之光千百斯年無不至也苟縱斧斤而入焉斯天折已爾天下之道二仁與不仁而已矣愛與忍公與忤樂與憂仁

與不仁之謂也曰愛曰公曰樂皆無害之理也曰忍曰伎曰
憂害斯興矣蓋忍則殘而心戕焉伎則鷲而性滅焉憂則勞
而神搖焉心戕者本傷性滅者理離神搖者精弊乃欲鼓缶
大耋之鄉受社黃髮之年是不可得已仁者戚人之戚喜人
之喜拔人之危理人之紛斯不亦愛乎樂善若貪隱惡若罔
忘過若棄釋怨若蠲斯不亦公乎鑒進退之幾泯寵辱之形
齊得喪之分斯不亦樂乎惟夫愛則心津津然而茁其萌惟
夫公則性熙熙然而萃其和惟夫樂則神愉愉然而游其極
心茁其萌天德形矣性萃其和沖氣合矣神游其極太字光
矣猶曰不壽無是理也司徒近山先生善積德修行純而各
全豈非古之仁人邪今年九月朔之七日壽躋七十耳慧而

卷三

漁石集

古

退補齋

聰目精而明顏若童然齒若兒然手作細書如鳥文行不以
杖乘馬策而馳之無有害故也由是而熾而昌而耆艾而如
南山之壽油油然而至之矣鄉士大夫登堂稱觥龍不佞乃
爲仁壽之篇以致善禱亦曰先生而能是也孔子曰仁者壽
吾聞其語矣吾見其人矣

執法篇

陝西按察司副使大竹陳子陞浙江按察使惟國家定制按
察之官總司諸路刑獄日讞其牒歲告成焉其道有二曰詰
姦正辟訊冤平反而已矣詰姦正辟義之謂也訊冤平反仁
之謂也仁以經之義以緯之而天下之刑斯平矣然義尚震
曜其功顯而譽易以興也仁務寬恤其德隱而嫌易以集也

人之恒情彰功而微德喜譽而憎嫌是故深文密理詳於詰
民之奸而正其辟世無遺法矣訊寃平反則曰未遑焉蓋暴
暴於義而仁之澤缺如也或曰執法當如是也夫法者中而
已法重當以入法輕當以出斯均謂之執也必曰執者附入
不附出則法之戾人慘於矛戟聖人無用法矣自古稱執法
有如張釋之者乎犯蹕者除死罰金盜鑲者宥族棄市未嘗
無出理鷹鷂鸞鳳其祥不同藥石梁肉其効異也大竹曰善
哉言乎凡司命之所願聞也

清議篇

漕運錢穀之府乃露積于舟而持之者又動整約束故奸利
易滋獄訟煩興而不息焉特置理刑主事以掌其案厥職專

卷二

漁石集

五

退補齋

矣其他不領於漕運若吏之掎剋有詞民之爭鬪有詞商之
逋債有詞則一聽犯於有司而主事不與焉此不易之制也
邇年理刑者不惟於漕運之牒而聽斷焉諸例所不與者一
切傍侵兼受廣捕逮密羅織繁案牘日弊弊然越俎代庖官
之僭也十羊九牧民之殘也清議咸不直之而論論誑誑騰
於道路達於京師減職褫銜者凡幾人於是當代者咸懼其
來來者欲去去者欲速若不可一日居也嘉靖戊子春獲拜
董漕之命都下士夫語以是故而憂之少宰中峯曰而今理
刑者乃李子尚綱志明行潔達於政體毋用爲憂四月陟淮
之境上問之父老曰賢哉理刑問之齊民曰賢哉理刑旣而
夷考之吏之詞至辭民之詞至辭曰自有主者若商人爭猥

瑣之利益弗屑以淆其政乃喜曰辨治哉慎度哉於是盡檢
漕運諸刑贖次第授之則曰是乃攸司敢不審克之姦則詰
讞則翦貪則繫僣漁則割正一尤以常刑而無所於貸令斯
昭昭然至於疑者辨其誣冤者伸其理困者疏其滯哀矜惻
怛又若不可以已繁辭不連於庭私謁不跡於戶政有常經
民弗擾矣由是清議秩然以定颯然與焉然則豈有不可
居之官哉居之不善斯不善爾居之善斯善爾李子方得代
父老齊民赴予留之而不可得也乃著清議篇以彰之且欲
其慎之終身云

東明篇

參戎文光張子自號東明人亦以東明稱之漁石子曰宣力

卷三

漁石集

六

迎補齋

之義廣矣哉暘谷在東日出于暘谷而蒼蒼然涼涼然是謂
晨明陽德用事羣陰伏矣靈曜懸象眾有闡矣蒙者著焉宴
者興焉閉者啟焉入者出焉輟者作焉是故寅以賓之而望
其景坐以待之而依其光况夙夜匪懈以事一人者哉是故
人臣之節莫大於宣力力也者志以決之氣以輔之志與氣
皆至然後其力伉伉赳赳賁賁不能奪之矣今夫夜志逸焉
逸而不已斯隨乎爾氣休焉休而不已斯靡乎爾日晡其明
鷄其鳴矣星其爛矣志逸思振孰啟之乎氣休思運孰趣之
乎是故聞鷄而舞克清江左戴星而出用父單父凡以是爾
文光其宣力之臣歟謹視夜之規廣惜陰之訓儆於一心以
翼其志勤於四體以勵其氣壯猷許策鞠躬而盡瘁恒若夜

之將旦日之方升焉於是乎令聞廣譽焜耀竹帛其爲國家之光奕奕如也炳炳如也吁敬之哉吾悲夫鼎食之家絜袴之子長夜之樂迄不知旦母乃墮其氣以息憊乎是故文光不爲也文光曰宣力於國忠畧勇功胥於是乎在乃舉是以嘉惠焉是望我爲國之干城矣乎敢不敬以從事

求文述

家母姓鄭氏外祖聽庵翁舅氏温卿俱登進士第實稱望族母氏貞靜懿淑自少以女德聞旣歸家君時大父方爲國子生家匱乏每出嫁奩以供事久之乃罄猶弗得歡心亦無怨言祖母何構劇疾二月餘諸食藥皆母氏與家君親爲之厯晝夜弗解衣帶卒弗能救方祖母死之日形容俱變髮中蟣

卷三

漁石集

七

退補齋

虱纍纍然大者能飛妯娌避不敢近母氏自爲沐浴殮以禮人皆曰孝哉婦也後大父爲思州府推官沒於任喪歸助家君以治塋事俸橐悉讓諸叔弗取家君治家嗃嗃然母氏一以柔順將之未嘗有疾言遽色旣家君沒哀毀如喪父然生龍暨諸弟共五人畜之以慈凡有善弗面譽有過訓以巽言令自改每以清白訓龍而自爲理其家茲寓陝近五年米穀之外未嘗市一物卽米穀亦與全值每戒家人不可虧人龍入仕二十年於斯田宅不具母氏每慰之曰兒子如此方樂耳然則母氏之教宏矣今年六月初五日壽七十先龍爲御史得封太孺人敢求一言以爲壽則百朋之錫不是過也

翟節母述

節母翟氏之婦王氏之女也年二十有奇而夫沒于疾遺子鵬藐焉而孩卽予同年志南是已母撫而泣曰吾其斃矣乎而姑爾強延餘息者徒以吾孤在其惟砥志迪義以慰煢煢之心俾見而父于地下而無羞容也乃毀顏髻髮終身誓不出戶闕雖飢寒備至抗焉居之而無悔心踰二十四年志南舉甲科躋膺仕母獲封安人尋構疾且殆曰而今得爲翟氏鬼矣則復何憾朝廷表厥宅里以嘉其節竊惟婦人之節有截頸斷腕而殞者亦有守義以待斃者皆天下之至難也或曰必截頸斷腕然後爲至而守義待斃猶夫女也自斯言行勸者寡矣夫截頸斷腕利害明於秋毫死生決於顛沛固憫然莫之及也乃若守義待斃定志於少持之於壯成於旣老斃後已焉亦豈易哉抑求其歸皆不忘乎夫不辱其身而已險易遲速非所論也予故曰皆天下之至難也夫薛方守箕山之節不曰不忠程嬰定夫孤而後亡去朔之死十有五年不曰不信然則母蓋天下之至難者哉

易經大旨說

天順初予師禮部尙書楓山章先生外大父靖江令聽庵鄭先生並倡易道于金華闡幽發微達于精蘊龍晚生猶獲游其門而學焉旣入仕版公事鞅掌至理忘筌正德丙子按部於雲南境遠而僻政約而簡乃時斂衽坐帷捧卷在手以意會象以言會詞以道會器以神會變幾三年或問曰庶幾有得乎曰而今而後吾知其難矣嘉靖紀元督學關西諸生必

請書之拒之曰易之爲道至大而精惟大則不可以單辭盡惟精則不可以粗迹窮吾無以應二三子他日又請乃爲離句析義發其大旨綴以講語括以破意非以二三子之所鼓篋而佔畢焉者方在是乎髮種種然猶支離于舉子學然則立言之道終身何如邪

子又字說

灑水天下之至險也淮之朱生而以命厥名豈以召侯稱虎鄭子從蠱法不避乎抑託物可以昭戒誠有所取于我韋絃之微且佩之矣名何傷旣而熙臺大夫授館於生乃字之曰俾父而進之然則熙臺大夫爲其甥也至矣易曰山下出泉蒙君子以果行育德君子之治蒙猶夫父水也山下之泉阻

卷三

漁石集

九

退補齋

沙陬石不得兩涯之道而由之是以悍急而峻躍濫乎觸矣襄乎陵矣故謂之蒙夫灑亦若是也與哉智者父之勇以決其勢緩以導其性則澗土田濟舟楫功用興焉是故人之幼稚而蒙也窒于理弗若於性鮮有不爲水之灑者乎夫窒于理則不達斯果其行已矣弗若於性而陵躐之志興焉斯育其德已矣惟果不吝惟育不驕不吝強義不驕和禮義強禮和則達於天德混乎源泉泌乎止水澡身澤物其利博哉然則熙臺大夫爲其甥也至矣生也質而嶷然弁而突然俾父之積吾將日有考焉

南岡說

東岳之尊曰岱宗書曰禋於六宗晉儒賈逵釋之曰河海岱

地之宗也夫禮士大夫有常宗山海無謂也雖然物莫不有
本本之所起末附以興均謂之宗亦可也是以天下之水發
源於河海故河海爲宗天下之山立表於岱故岱爲宗人與
物又何間焉仁人孝子比類以象德假物以繫思何所不用
其至也哉按察使唐君需之歛人也歛古大郡郡之中山崔
嵬若人立不有黃山烏聊乎烏聊居中引之西北乃黃山峙
焉黃山南引槐塘心園蔚蔚然東引南岡起矣然則烏聊其
宗乎猶夫岱也黃山承其脈槐塘心園衍其支南岡乃亢其
宗者邪君始祖梅臞者篤修考亭之業於烏聊之上梅臞子
筠軒講學槐塘道德炳然學者師之筠軒子白雲卽心園築
三峯精舍論道其中澤澤如也卒傳之子梧桐以文行被徵

卷三

漁石集

三

退補齋

命至君考履素茹潔乃構復庵于南岡之麓而遺之君曰毋
忘前人之德君遂居南岡不敢辭也烏聊在上南岡在下槐
塘心園在左南岡在右復庵在前南岡在後吾見觀高山者
篤仰止之心崇作室者恢堂構之緒至哉洋洋乎仁人孝子
之道興矣詩之南陔君子曰詠孝子也然則南岡者其卽南
陔之謂乎

疊庵說

疊庵者乃疊菴先生卽其所居而號之也漁石子爲之說曰
銘盤取新之意也訓器戒滿之詞也先生殆勤於君子之道
者乎疊疊猶勉勉也志若不足行若不及居若不違弗已其
功之謂也君子之道廣大無垠流而不息則豈易易易哉夫

惟有不足不及不遑之心者斯至之無難矣何也虛者盈之本也小者大之基也勞者逸之門也不足然後足不及然後及不遑于處斯處之安此不易之理也是故江河之浸不盈故受日月之明不匱故光而況於人乎苟訑訑然自足意斯滿矣閑閑然自以爲及力斯弛矣媿媿然遑于啟處而不知省焉節斯狎矣意滿者其失矜力弛者其失怠節狎者其失蕩是皆不足以望君子之道也先生行魂而受虛位高而慮下功博而體約是故足矣歆歆若不足及矣皇皇若不及遑矣猶曰吾不遑焉惕如也凜如也夫曰已足已及已遑者斯已焉矣而常曰不足不及不遑則不竦乎其內而跛乎其外慎于始而要其終德可以久業可以大而君子之道備矣蓋

卷三

漁石集

三

退補齋

自虛者以積盈也自小者以致大也自勞者以成逸也又孰能禦之乎詩曰疊疊文王令聞不已文王不待於疊疊也師文王者然後待於疊疊也功久則著誠積則彰令聞興矣然則先生其有令聞也夫

楓岡說

侍御史章甫自號楓岡漁石子曰號有說乎章甫恫乎其心蹙乎其容對曰有弗忍言也漁石子曰雖然子必言之章甫曰夫岡先世所封植而祖之墓在焉父亦附焉豪族睥睨侵其疆畔將盡有之訟於官司弗能禁僅餘坏土與楓樹二株而已糞掃祭祀不得展於歲時是用大戚旣豪族蕩覆岡鬻諸太守馬氏太守好義復還於徐氏母氏之喪附之而與父

舍其曠昔不得糞掃而今得糞掃矣昔不得祭祀而今得祭祀矣故遂用以岡爲號庶幾油油然不忘吾祖與吾父吾母而子孫勤於徐氏者亦不吾忘而世守焉彼豪族又豈得而睥睨之也哉說若是爾漁石子曰孝子仁人之心也禮曰致愛則存致慤則著從其至焉爾夫岡徐氏先世得而有之而中徐氏不得而有之今徐氏又得而有之因地以著稱因稱以系思因思以明守因守以貽則因則以詔遠故曰孝子仁人之心也傳又曰木託太華而高木得其託斯高矣君子之道得其託斯亦高矣今夫御史之職可以言可以行君子之道託之言焉行焉章甫國之楨榦也而官爲御史于是乎挺勁操植峻功樹遠聞拔乎流俗而光于國家不猶木之在岡崢嶸正直出塵而昂霄乎假物喻志是亦說也故進之

晴原說

賈子號曰晴原客憐於其說而問之賈子曰名以義明其稱也號以名意相承也先大夫命予曰啟啟古從日說文曰晝晴也又從口開也詩云啟之闢之治田也又云昞昞原隰曾孫田之予倦矣將息神休力鼓腹而田乎故以見志焉爾漁石子曰祿而思耕行而知止志則嘉矣抑有大者哉吾語子晴天氣之舒也原地理之衍也天有陰有陽陰閉而陽啟閉斯霧斯霾斯禊斯氛陰之滯也啟則晴現焉日麗其象雲呈其祥星耀其景陽其霽乎地有險有夷夫險石嶽焉林莽焉巖窟焉壑冥焉鬼魅出而蛇蛇育矣夷而爲原其甸秩秩其

壤膻膻其傍有紀平若砥也曠若達也夫室則有礙障則弗達惟原弗窒弗障而被以日之光清風載興陰暄消伏鸞鳳翔翥翹翹不生是故有君子之道也何也君子一掬而六合方寸而太虛內直外方險阻不設人心不有原乎于是撒蔀去翳啟其天德虛而不塞著而不蒙泚而不晦若青天皦皦然白日杲杲然賈子以之則何如賈子曰大矣大矣記以高明廣大而論人心高明其晴之謂乎廣大其原之謂乎吾慕力田而得養心之理敢不拜而受之

誓神詞

國之于神其聰明正直禦大災捍大患者則祀之是神固國之衛而民之主也是惟六月百穀在土敷榮吐華固宜及時

卷三

漁石集

三

退補齋

而雨之乃自初吉迄於浹旬不雨庶府恤恤然卜于十四日索神而禱之又雨二十一日再禱之又雨二十六日再禱之不雨益甚苗則稿矣民則病矣人子有疾父母常不俟求而瘳之豈有既求且哀而弗顧邪父母何心也民有災患神當不俟禱而救之豈有既禱且數而若罔聞邪神何心也是必在位者奸政敗度重殃斯民神固赫焉興茲變沴以彰厥怒乎夫在位殃民而神之怒又於民焉民殆反覆受害者邪况神之靈殃民者猶惡之至于神乃不能禦民之災而捍其大患以致旱魃煽殃風伯助虐焦土田殺禾稼民暘然以待饔神其謂何勢急者情危憂殷者辭迫茲與神誓其亟軫茲悲闡靈化大降雨澤以生我百穀以寧我眾庶俾弗玷於

危亡苟在位者之有疚則察其苛慝而降之罰毋徒移於無辜以苦斯民爲也若仍不雨則國將怒曰是惡足爲民之主民亦咎之曰是何爲血食於我則神何辭乎惟垂明聽而鑒焉

禱雨詞

翼翼雍州高下廬田兵糗維億王餼維千歲乎豐矣庶民且艱饑饉有加則靡不殘六月季夏土潤斯溽黍稷在野咸仰膏沐胡早孔熾胡雨不足赫赫炎炎焦山涸瀆垂政表盥否德作徵豈官之慝于神之靈庶正丞史若疚在身厥罰是請勿移于民民之云瘁幽明同失虔告有神亦率厥職發彼慈悲昭爾正直妙合元機龔張靈德時雨惠興被此庶方百穀茂止蕤蕤穰穰滿篝滿車如茨如梁民頌有作神貺無疆

卷三

漁石集

三

退補齋

賽神詞

四月維夏輶車粼粼至止原野勞此農人農曰政和麥旣茂矣叶莫反風雨時若歲則有矣靜告有神止風興雨神之聽之其應如鼓暴風斯戢時雨斯興廬田霑足柔條不鳴我菽穰穰我麥殖殖于皇盈止伊神之力椎牲舉醺用賽神休神其無斃俾穡有秋

祈雪祝詞元日有大雪之應

吏所以食民之賦神所以享民之祀者而豈徒哉蓋政令刑賦攝于吏雨暘祥沴司諸神故政令苛紊刑賦不均則民眊眊然曰惟吏之慝其或恒雨恒暘祥沴失極民亦得以詰諸

神曰惟神之羞茲乃太陽表沴經冬不雪水泉就涸土脈立
枯麩麥不榮黍穀難藝斯民蒿焉日昃於危亡矣夫垂氣致
異咎德作徵凡我祿食滌德修政實不敢後期抑禦災捍患
神司乎民之事承乎天之職也獨無咎乎哉元日雪降文昌
之所爲瑞也季春雨雪求禮之所爲災也故及今元日而雨
之民猶有瘳焉緩則不及矣神其謂何嗚呼怠天之職者不
可謂之恭玩民之災者不可謂之惠惟神圖之

謝雨詞

是惟六月浹旬不雨民心皇皇庶府恤恤乃誓神而禱之而
神翕張靈機開闔元化果于五日之內誕降雨澤以蕃庶穀
以育羣生其應若響焉蓋敬天之職而不怠矣恤民之災而
不玩矣敢不敬陳庶羞用答神貺抑濡而後援不若勿令及
溺之仁之爲至也旱而後雨不若時雨時暘之利之爲溥也
自茲以往亦惟十日一雨歲三十六雨敷時若之極協太平
之徵神默其功澤穰穰也民忘其憂利莫莫也官府無事於
禱政沃沃也則神之德其至矣哉

過清浪祭大父哀詞

學登者庸行彰者終德滋者壽修於君子而應於天若鑿地
而泉也卽不然者理之窮也大父讀尚書先王大訓咸受其
義學高明矣力孝悌崇恥讓明介辨飭廉隅厲風迹行正直
矣貴之思土夷民獸大父推思獄仆強植弱哀其無知德在
民矣然大父童年卽持其學以程于有司比壯不利五十獲

一職但尉而已庸乃弗顯以疾沒於思喪貧不具終弗于家
沒之歲五十有四壽弗大耄嗚呼幸而大父修于己者美而
無闕也不幸而天應之不至閔然遭其窮也又幸吾叔輒其
柩以歸吾父瘞之於墓廟祔而唐氏之祧秩也且吾子孫曰
蕃詩書盛而手澤長也乃大父不及見焉又不幸也龍正德
乙亥按部雲南次年四月朔道經清浪衛清浪距思三十里
昔昌黎公刺潮州死有廟君子謂潮人德公神留弗去大父
德在民民依焉其神不眷眷於思乎乃易公廩布几筵望思
而奠奠闕乃哀哀盡申以詞曰神繾綣兮甘棠之區瘴雨結
兮炎風噓蘭之水兮天河瀦谷若磬兮中元虛山崩鬱兮盤
紆敷春華兮掃豺貙軺翩翩兮登雲衢靈胥前導兮電疾其

卷三

漁石集

美

退補齋

楓山先生行狀

予師楓山先生沒之年龍弗預于執紼之哀大有戚焉今得
觀諸君子所爲行狀與述與傳與補傳與祠記咸秩秩然昔
明道之墓門人數十人各用所知而自爲文以述其道庶幾
無遺行先生沒後少宰中峯嘗以是命之且申之曰予撰先
生誌銘有待于子之言其毋怠乃獻欬而言曰先生姓章氏
名懋字德懋稱楓山者號也先生生而嶷嶷然聰明穎悟書
初讀卽舉其要而再而三終身弗忘其學根據六經尤邃於
易煥然溲然而入焉逃蒐紀載上下數千餘年如見當時行

事旁及百家諸子罔不考究至論舉子學則蹙然于容其志遠矣天順壬午掄魁于鄉丙戌試禮部劉文安公校其文曰是故茂材乎乃舉會元登進士第授庶吉士是年狀元實羅公倫道義風節與先生偕先生在中祕三年凡國家典彝品式章程法制博綜精覈歷歷無餘緒始先生明於稽古以後稱通今者亦莫先之尋除編修月餘會元宵舉放燈火爰命館局賦詩進呈先生以燈火非昭德之器詩賦非論思之業乃敷古訓陳遠圖以爲疏謇謇千餘言偕同官黃公仲昭莊公景連署而上之杖於闕下謫臨武知縣直聲忠槩天下想聞乃稱三君子時羅公亦抗論時宰起復非經制謫提舉海舶又稱四諫猗歟偉歟出國門言者申救改南京大理寺評

卷三

漁石集

七

退補齋

事至則詳檢刑牘凡鞫讞每務惻隱之實而弗以亟疾苛察相高廷中稱平三年考績疏歸省雖未顯言去而志有在矣尋陞福建按察司僉事先生曰惟綱惟紀吾今日任之由是校勘獄牒剪剔吏蠹踣擊官邪疏滌民瘼百姓獲安寇賊姦宄無所容施于有政澤如也然性鯁鯁與行部者相齟齬大議大計惜弗獲盡行焉耳歲序卻桃符書于門曰正要鬼神司屋漏何須茶壘衛門庭又題其楹有多病早掛冠之句皆以明志也踰三年以考績行遂疏解職浩然而不可留也天官三詰弗宜去先生三復曰宜去語在補傳中竟得謝年四十有一天下曰賢哉大夫其歸也閉門卻掃跡弗入城府薄田數十畝聊以自給而已構樓三間中張布帷左右置經籍

日縮而觀之顯曰形器隱曰道德蹟曰事物精曰性命觸類
旁通內融而暢于外興至則振衣躡履散步林壑濯于清泉
坐於茂樹其所謂浴沂風雩之樂非邪四方弟子從者如雲
執業問難橫經而論道顯賢名公卿巖穴隱者仰止高風接
軫於門貧無供具刈蔬脫粟而餉之或諷爲文章曰小技爾
予弗暇又有詰弗著述者曰先儒之言至矣盡矣第刪其煩
蕪可也家食二十餘年元臣與臺諫論薦無虛月咸以出處
卜治亂焉南京缺國子監祭酒孝宗皇帝灼知先生名故特
用焉先生方居父喪乃增置司業虛其席以俟先生終制昭
異數也卽吉再辭弗允始就列首勵教化倡德義明道術著
功令肅儀軌洋洋如也颯颯如也六館諸生握衣而前離析

卷三

漁石集

三

退補齋

經訓以敬業辨論治道以定志揚摧古今以知類錯綜名物
以程能猶洪鐘待莛隨其扣之大小而各盡其聲焉猶渴者
飲于河或斗或石斟酌飽滿咸津津而退正德紀元陳言勤
聖學隆繼述謹大昏重詔令敬天戒五事履霜之辨析矣先
後五疏乞歸皆弗允乃引年以請復三疏始得謝焉未幾陞
南京太常寺卿辭弗允復陞南京禮部侍郎又辭詔許以侍
郎致仕謝而不辭禮也癸酉江西盜充斥聲連衢婺居民洵
洵眾強先生徙城中以居而非先生意也壽考康寧耄修不
倦守臣與行部者咸疏先生宿儒耆德宜崇禮秩以風勵天
下詔飭有司以時存問嘉靖中興特陞南京禮部尚書致仕
亦從臺臣之請也辭弗允且降溫旨以學行老成名實相稱

褒嘉焉辛巳歲且暮龍辭先生赴關中任先生留爲其少子
接約婚旣成曰汝往往吾及送汝還吾其能待乎其惟惇彝
典翼前修老夫之祝也龍再拜曰敢不受教披淚而別時十
二月之望矣先生乃於二十日構疾夜星隕于舍其光炯然
除日未時白氣如練氤氳上游申時先生乃沒壽八十有六
存問之使在途而弗及矣得贈太子少保謚文懿痛哉斯文
之戚也先生天挺其質瑩乎美矣尤學以達本介以辨義養
以成性行以迪德其貌于于要之天下嗜好一不入于心超
乎富貴而藐之真浮雲栩栩爾其詞恂恂及論事決議明計
利害直指是非譬諸黃河懸于崑崙之巔其性無競於物乃
嫉儉夫抗流俗狂瀾滔滔砥柱不拔宿怨舊惡尤泯泯然而

卷三

漁石集

无

退補齋

遺焉釋焉退而在野憫時憂國心未嘗忘環堵蕭然將終其
身而無愠色先生恒言曰吾葵有鄒魯之風嗟乎明哲日湮
道學功業文章三者橫棄道側誰其任之實以勗黨小子龍
之不敏尤數數致望焉龍則曰孰有任之如先生者乎先生
之學惟務身心而不沈洋於口耳嘗論吾人之形性同天地
之體用又云人心有大有小大心窮理小心慎獨又云虛無
害心又云政體始於格君心又云致中和可以躋唐虞三代
之盛吁有味哉北山諸賢所謂道學者亦若是爾自編修以
至尙書立朝僅四十日官不過三考乞休凡二十餘疏典刑
風烈廉頑而立懦則曰百世之師可也其匡弼世教防範人
心之德宏矣蓋與忠簡默成各自爲功業可以隱顯論不可

以大小觀也先生所遺有楓山集與鄉賢蘭谿志諸篇雖不爲蘄絕奇詭之體以爭長于世皆以意會理以詞達意大音而聲全玉不琢而文彩自蘊至於諫止燈火一疏尤在培養君德卽詩書詔其君者無以過焉視唐宋諸名家之言又不知孰爲後先也龍弱冠卽侍先生而今年則艾矣于先生目擊而道存者也君子曰目擊而道存不可以容聲然則先生豈可以容聲哉若千百之什一斯可已爾君子其博采焉

五泉韓子墓表

五泉韓子諱邦靖字汝慶西安朝邑人也父蓮峯先生母恭人閻氏恭人夜夢五色雲中樂聲洋洋旌蓋番番玉女十餘擁一童子入室而五泉生聰明異常兒五歲讀論語至文王

卷三

漁石集

三

退補齋

至德篇若有所思旣而曰是故武王非乎蓮峯爲福建按察司副使攜家往當渡江與恭人各一舟五泉泣請同舟而濟豈以波濤叵測父母皆不可離邪是亦五歲時事十四歲舉于鄉正德戊辰與其兄苑洛子同舉進士初授工部主事當視十庫至卽坐前席中侍給曰尙書至矣方起坐已撤曰官人無預庫事五泉曰然則去耳中侍曰請書案五泉曰豈無預庫事乃書案乎必竟坐又當監收黑窰廠廠之利歲歸於內而加稅天下五泉乃悉遏之羣宦噲噲亦弗顧又當督課浙江先執事皆取羨餘以進五泉曰聚斂之臣盜臣不如而吾爲之乎下令曰非巨材與竹木成器者不稅商人至于今德之舊額課領于府幕以其易與也分司刑獄付下吏又易

高下五泉奏行布政司領課諸刑獄得付按察司遂著爲令
鎮守太監歲擅課利是時太監劉璟怙勢張威觸者輒糜爛
五泉固不與璟始銜之而終敬焉有倖宦自京師至索課利
甚苛璟止之曰韓主事卽索之何爲吾當有所贈時有同年
爲杭州推官以五泉無子市一女往遺之拒弗受同年曰若
越女之華而麗者可備巾櫛曰惟華而麗故不欲也是皆非
有德操能之乎旣報命尙書劾課額弗盈五泉曰昔人豈無
署拙請囚者乎亦自劾求罷朝廷釋弗問壬申春燕齊盜起
聲震京師師行工部當有前除厥皆難之尙書數問五泉五
泉曰人臣義不避難請行烈哉烈哉盜平陞都水司員外郎
督催諸路匠役銀乃以民貧奏乞免徵蓋不欲以財利事君

卷三

漁石集

三

退補齋

也癸酉二月會宮中火災詔求直言五泉請御經筵修朝政
節盤遊遠檢壬召還言官辭傷剴切乃下錦衣獄眾懼不測
臺諫合辭申救放諸本郡時蓮峯已致仕苑洛子亦以剛直
奪職家居五泉曰孝弟力田吾今日之事也乃服稼力穡身
親耒耜曰吾勞而父兄逸不亦可乎己卯蓮峯病湯藥親嘗
然後進左右周旋終夜不寢晝或忘食歷四月弗懈蓮峯旣
沒哀毀骨若立負草土卧於柩下盛夏蟲蚋叢積一振衣躍
落如雨旣葬苑子廬于墓側五泉倚門而廬以奉恭人昏衍
且至墓所與苑洛子撫膺大哭聞者慘然旣苑洛子以哀致
疾幾一年五泉亦親嘗湯藥凡溺惡下必諦視之若五泉之
孝弟豈非出於天性者邪嘉靖改元用薦者召爲山西布政

司參議分守大同路先是高山陽和草場數萬畝武豪歲擅其利于是悉割而還諸軍境內歲大侵人洶洶然無以爲食疏請發內帑而長活之部司格其議乃陳布利害執奏益力語侵部司而部司雖不從亦不加之罪也其他察民隱剔政蠹繫豪孽斥貪僚訊冤牒惟日若不足其謂之孜孜爲國知無不爲者非邪諸撫臣與行部者皆列牘而薦之而五泉疾矣亟疏以告至再始獲請軍民遮道而留之而不可得吁吁而泣曰明公果不念吾儕小人乎五泉亦泣遂行嘉靖二年二月初十日抵于家上堂爲恭人壽叩先壠哭而奠焉牲見于祠堂皆如禮乃是月十八日疾復作四月初十日益劇語苑洛子曰吾其逝乎十九日天必大雷雨其亟治具夫吾父卒於二十一日吾必待之至十九日果大雷雨遂不語苑洛子爲正冠乃搖首示有待也苑洛子曰豈誠待二十一日乎守之二十日又問又守之二十一日果卒實生於宏治戊申閏正月初一日距今三十有六歲痛哉配安人屈氏無子擇族之子仲譜而子之卜以六月二十二日紼而引柩墓于南陽洪先瑩鳴乎異夢呈祥震雷兆變天於五泉則至矣夫何疾而天之乎君子嘗曰有不可詰之天初不以爲然若斯類者非不可詰者歟

明封戶部主事呂君墓表

呂君儼諱綸字道言乃按察使九川子之弟戶部主事顯之父也予於九川子爲同年而若子顛舉人予門人也且辱

元部之交有日矣因而亟聞黨巖之賢而未及見也不虞黨巖乃於今年正月二十六日亡矣戶部泣而寓書曰先人不幸不祿屬諸成壙之期涇野先生而惠然辱銘之先人死且不朽亦惟君子哀之而表諸墓左先人死且不朽辭甚哀嗚呼涇野之銘至矣而切切於予言何爲也哉雖然是故當言也竊聞于其友則知其人于其兄則知其弟于其子則知其父古之君子以是觀人取友任賢卜相恒無失焉是故涇野修道砥行國之大儒也于黨巖生呼爲友死則悼之悼之不已而且銘之黨巖之賢可知矣九川子士尙志而德日以起也官守道而業日以崇也殆無私顧之心以攜之者乎人皆曰有黨巖上奉太夫人下務力田而後能爾也黨巖之賢可

卷三

漁石集

三

退補齋

知矣戶部學瞻而不溢行成而不矜蓋速似乎九川子者也謂非黨巖之教則可乎是故朝廷特封之戶部主事以昭其休美而尊榮之黨巖之賢可知矣黨巖嘗曰世之阿諛而苟容者吾深惡之阿諛者媚世苟容者徇物媚世易誘徇物易隨黨巖乃能憤然而惡之邪夫疾阿諛則直己之節亮矣不喜苟容則抗俗之行高矣是故涇野所以友也九川子所以弟也戶部所以父也賢矣哉賢矣哉

哭門人張之渠文

張子之孝賢者之行也乃數日而疾三十二歲而死豈天之黯然不知矣乎然瑞鳥表異靈泉發祥夫孰爲是曰不知固不可也蓋天自弗能違乎天猶人弗能違乎人也是故莫爲

者無庸于爲莫致者無庸于致天斯運而已矣人斯受而已矣張子亦猶是也或曰盡孝以滅性作善以速禍夫豈然歟夫豈然歟

祭蘇鄂南大夫文

清廟有材工則度之嗣服昭哉考則作之作之伊何以引以翼肇箕曰弓啟構曰室吁嗟君子履貞茹美孰悅泉石錯綜圖史道暢元風跡奮遐軌古之逸民今之高士惟嶽挺耀惟豐吐靈篤生賢允寶國之植義方旣秩式穀旣明玉琢其章金範其形於美奮庸振鷺在廷爰司銓管庶明並升進典秩宗逖修遺文景鐘載績素絲揚清子祿方來父年不逮朝露溘先昊天云邁捧檄增吁坐茵徒慨手澤未湮訓言孔佩奕奕大明永錫孝理水以源廡木以本起不有是父詎有是子載渙天章茂降帝祉父賢子象子秩父偕輝聯橋梓風動草萊稽首北闕宣志南陔日月流光雨露警節惟墓在墟宿草不伐陟岵望迷遡風憂結叩闈陳詞伏地出血搖搖旆旌樂樂子心稅於墓間涕泗隕膺司祝致告縉典肆陳厥生維穀厥死維榮九原斯慰南山聿銘報深一本慕槩終身德以寵彰慈以孝徵曰臣有勸曰子無斃炳矣邦儀遐哉世則

祭王淑人文二章

俱代作

風以火出乾惟坤承化基召南俗啟媯瀆截織勸學澣衣揚清王公下士咸利女貞吁嗟淑人其生也穀展矣碩媛蔚哉世族令質金相惠問蘭郁闈儀有翼姆訓維淑結禱申聲君

子於從江漢曜德蘋繁緝恭絢增素後理蘊黃中朏魄斯載
坤美攸終聿相君子爲邦司紀茂建徽猷式昭彝軌帝閭載
聞曰惟賢妣龍文鳳章錫之繁祉繁祉川至胡邁閔艱孝哉
有子棘心孔藥藥必親嘗寢不解冠素華旣歇徂音遽捐喪
釜悲興鼓盆歌息同室異路昔歡今戚畫翠載綏靈輿遷跡
蕙風啟途杪秋卽安憲憲政府我輩儀刑義急有喪涕惡無
因望帷畢弔執紼載臨昭彼遺則白石嶙峋

又

圓精方祇旣鑠旣疑兩儀奠麗萬物區萌夫婦伊始伉儷斯
升鳳凰于飛關雎好音於昭淑人女中之式聿自未笄素絢
含質爰及于歸瑾瑜宣則乃言乃功乃容乃德君子赫奕秉

卷三

漁石集

三

退補齋

度中丞素絲之清金鉉之勳冀妻致顯吳婦揚名孰曰君子
不由淑人白首維期中路永訣冲華上騰順則內闕靈衣禮
歛素輻綵結清風戒寒皦皦晨發盍簪同署脫驂有懷蕙塗
光暖蒿里音摧殺核薦俎清醑申壘邈矣九原泫然一哀

祭陸鶴山先生文

鴟臣鞠凶皇輿陷險君子騰詞惟忠蹇蹇朱雲請劍子橫落
裾爰弼宗社乃殞厥軀天下舉忠皆曰君子三綱不騫君子
不死君子之心雪葵之英君子之靈倬彼列星生芻白茅哭
撫遺柩我泪如沱我心如疚

郭朴菴暨配吳安人合葬墓誌銘

郭翁諱文演字世廣號曰樸庵其家乘稱出唐令公子瞬之

允爰自華陰徙温州之錢浦子姓蕃衍分徙天台又徙東陽
長衢元季有魯三提轄者爲翁七世祖由長衢徙蘭谿州後
而家焉遂爲蘭谿郭氏提轄生壽三壽三生冲素處士仲達
仲達生仕元仕元生政玉是爲翁祖政玉生翁父守瓚娶徐
氏翁母也生翁甫六歲父喪失所怙母氏撫而成之旣長事
母以孝稱翁頗身豐頤狀貌魁岸嘗先後遇長蛇猛虎勢甚
惡卒不敢迫若畏翁然又夜分涉浮梁風雨暴興梁斷翁溺
倏電閃水中現鐵繩援之而登岸族長老業知翁爲厚福人
厥初家汨如翁善操奇贏而以勤苦日引之遂累萬金之貲
邑擅富者鮮其儔務以約承之而不驕焉凡接人夷度和顏
色恒謙謙然諸所服室食用務從其儉或諷之稍豐長拒曰

卷三

漁石集

美

退補齋

富人奢愚之道也而吾豈敢然性尤好義其祖與叔祖共壙
而父與二伯父壙亦相附歲久胥就圯而圖修之或曰親疎
無分乎翁曰分有親疎情無同異遂伐石壙土並封而起而
樹以碣惟堅惟阜外觀亦不飭也遇諸窮乏者識不識所稱
貨卽與之勿吝亦勿苛其償邑之西南有萬檀橋以木結構
纔水溢卽衝激不可渡乃易之石費至百餘金往來者實賴
之每見人子弟輒隨分勸勉警其偷惰蔚有長者之風人亦
樂而親之凡有鬪願就質曲直他人累數百言不能息翁一
言卽處分邑前後人喜結官長持訟事翁居尤密邇乃搖手
而避之而不一滯迹焉章文懿公極慎許可姻黨中獨雅重
翁亟稱曰朴哉此老是能當其富者而貺之以文樸庵之號

自此倡之翁有餘榮矣其他鄉先生若北園竹溪二鄭公董公東湖朱公青山翁公東川每與公相過從叩翁邑中前輩事類能一一道之諸公終聽而忘倦翁晚年又約諸耆年爲十老會第相椎牲舉胥以願其天年而已俄構疾瀕殆戒其子佩罔修佛事牽孫之手誨之曰爾欽勤而家爾銓懋而學言訖而卒時嘉靖庚寅四月十一日也而其生乃景泰辛未正月二十七日享年八十歲配安人吳氏有賢德以勤儉相翁裕厥家先翁卒於嘉靖丙戌六月十九日實生于景泰丙子正月十四日享年七十一歲生子一佩約已循理勉承翁志孫二長欽榦字克振娶朱氏卽青山公族次銓補太學生娶太學生朱良輔女曾孫男七堯紀太學生堯紹聘金華姜

卷三

漁石集

三

退補齋

省元良翰女堯綬堯紳堯績堯約堯納俱幼未聘曾孫女二長適官生唐俊則予孫也次女未聘佩相度吉壤凡數年矣而得觀山之側窺而竊之下嘉靖某年某月某日之良紳翁柩與安人柩合葬焉哀哀然執舉人徐子袍先所爲狀而請銘于予夫翁之行是可銘已其銘曰

頌而碩而厥性乃樸以樸積富以富返約儉德適操義方孔灼生曰朴哉死兮不鑠

郭樸翁像贊

修髯長軀貌乃癯癯富雄萬金好禮沃如迹韜林壑義振鄉閭曰士則善曰民則耆

方節母述

節母章氏女也年二十字同里方良規二十六良規乃亡遺子鉅方六歲族之長強母俾改適母曰斯言也何爲至于我哉夫子之天也乃欲予背乎孤鉅予之嗣也欲予棄乎背夫滅義棄嗣安忍實皆不能予惟哭撫遺孤殞焉待斃而已自茲請勿復言乃毀容髻髮終身無二志而今年八十有奇矣鉅忠信樂善年亦六十有奇其子禮聘予妹重母之賢乃遣事之比有司聞母之節于朝

後半
缺

序齋說

至矣哉總戎希仁之愛其子無已也名之曰立可以已矣猶未已字之曰於禮可以已矣猶未已立自號序齋請於君而從之曰知本哉蓋禮者立之基也序者禮之本也人不可以不立無禮則不立禮不可以無序無序則無禮人以禮立禮以序行人之所貴者曰禮而已禮之所貴者曰序而已是故名之曰立者欲其立也字之曰於禮者欲其禮也而終從序齋之請欲其序也今夫閑軍旅者不諳俎豆之事操弓矢者不聞珮玉之音其居然也立也敬之哉由序以求禮由禮以求立守身曰慎度居官曰奉法行師曰循紀斯無不善矣

紀綱書

立國之要紀綱而已矣是故國家定制內設都察院以總乎紀綱之司又慎選巡按御史分道而出奉諸紀綱而布之天下其責不亦重乎哉比歲涖陝者赫赫然孰不欲紀綱之宣耶然而夔度猶斃民愚或與竊惑之嘉靖甲午之冬侍御史

卷三

漁石集

美

退補齋

周子汝威執簡以至夫汝威擅近道之資崇秉心之要予逃
知其能於紀綱也是故居常閑於大訓動遵矩矱惟寅惟忠
若處女之在室然尤務揚清茹苦卽圖書必慎飲食之細亦
介焉辨之行不羅旌旄做車羸馬而已矣諸司相見約循分
庭之禮卑卑愆于儀者則峻拒之而士風有不競者耶貪僚
暴吏斥勿貸其有誣誤於法與橫罹羅織者尤秉公雪之凡
錄囚輒曰死者不可復生可不於死中求生乎是故惻
然以訊之諸冤牒多報平反仁愛津津然矣府廩錢穀則隨
其所至綜核稽考無遺法焉荒陲遐塞不識行部之轍久矣
乃自朔方以迄延綏迤邐二千里嬰險涉勤直潰聲息而周
歷焉申飭邊防作新將士之氣疆場聳然謂非忠之至而能

卷三

漁石集

三

退補齋

是歟汝威每修束於予亟求聞過若弗逮然予嘗與論諸風
采出乎身而非取盈於外也衛武公恂恂自修是故赫焉喧
焉風采煥矣夫其盛於吻勃於容乃聲色而已風采云乎汝
威謝曰以聲色爲風采不幾于砥作玉哉固不敢也又嘗與
論刑之失平災所由作也是故六月之霜隕于憤三年之旱
熾於冤昭可鑒已去年關隴俱大水漂溺數千人毋亦官司
刑之失平哉幸而安厓中丞巡撫汝威巡按方共修平刑之
政其何災之憂汝威又謝曰天道邇哉可畏哉小子凜然懼
矣然則汝威固汲汲於檢身者耶檢身至而風采生風采生
而一方之紀綱布矣夫尙德則威著尙威則威捐治已則治
達治人則治壅本之若是焉耳予不佞乃於汝威懔懔然而

欣其果能於紀綱也作紀綱書

五言古詩

五月桂花

五月雨如濤石澗鳴泱泱開軒酌清酤天風吹我裳清香何處來雙桂先秋芳顧之花皎皎移酒飲花傍獨酌醉復醒花照酒中黃

斗湖書屋登山聽風對月講學懷友倦遊檢書宴坐八

首次于中韻

道人住雲谷晨出肆登嶺白日光易謝惟有山中永舒嘯草木靡榮梨花耿耿

開襟當清風脫然起喬木久之復無聲座上巖花覆天宇生

卷三

漁石集

平

退補齋

微涼一解吾民海

日沒綠煙泯林巖起陰肅涼月生海溼亭亭照茅屋清樽幸相對山中影不獨

學士訪山齋晝雨花冥冥疑義相與析辨論紛若爭廢講重吾憂孔聖曾丁寧

友生之何方春夜傷獨遊顏色不可見梁月空悠悠素書附鯉魚道路迴且修

馳驅倦風埃回車息茲邛日就桑麻交近局消閒愁顧予久行役緬焉中含羞

清溪映欄庭白雲宿柴關牀頭檢亂書短燭燒將殘燭殘不必續明月已在山

默坐與世冥至理
飮而厭營營矜眾智
靡學良可砭寧靜生
虛明從茲息妄念

再至白鹿洞次陽明公望五老峰韻

五老隱雲間經年再相見
乘月厲清溪攀蘿度岑巘
頃諧邱壑心淨洗風塵
面山神靈不死物理盪中變
風雨剝樽彝蟲鼠逸經傳
往迹空冥冥永懷中眷眷
鹿去主不歸酒熟客自勸
焉得抱鹿遊居吁息妄辨

鉛山察院後圃多竹中結亭下有池涓涓然次國華道

長韻

臺亭面鵝湖諸峰削奇玉
修竹密如蒲直造興不獨
枝亞乳鶯啼根交雌雉伏
井池泉涓涓清淺比淇澳
爽氣五月高

卷三

漁石集

五

退補齋

陰數畝足瀟洒廻出塵
正直可扶俗矯矯歲寒姿
不避雪霜觸

次陽明先生遊青原山韻山在吉州

大塊闡靈化眾智淪浮埃
馳驅踵相躡衰白頭誰回
我家曲江頭又傍南山隈
漁石波瀨淺樵逕雲霏開
吁嗟蒲柳質誤收梁棟材
塵容草草堂遠倦迹窮途
哀情竇澗壑心境盤坵崖
洪都媾阨運驕王生厲階
周行靡荆棘厦屋多危棖
修轡追遠攬朱輪願深埋
回盼匪逸足詎堪厯廣垓
迂愚觸忌諱摘抉招嫌猜
偶聞勝遊地草木皆雲芟
珠林繞蘭椽蓮河浮木杯
宏寂皎華夢虛曠蛻遺骸
忽令神意飛寧辭筋力摧
白雲山上待康鹿山下陪
茲遊幸得遂聊避塵世
厄彷彿山神

言爾飯忙煩哇何如息故墟溪山維其偕子陵謝諫議淵明
賦歸來紫蕨春雨香白黍秋風催顧之神不見松月空徘徊
中峰挹層漢上界澄纖埃幽祕巖扉寂縹紆松徑回佛臺置
石角僧舍盤山隈日麗金色掩雲聯緯象開朱草四時葉靈
榦千年材麋鹿不避人元猿清嘯哀曲曲溪抱村滴滴花然
崖青青竹蔭戶白白茅覆階煙霞宿飛棟風雨鬻雕棖法流
泥形役晦影深光埋眾有化芻狗天地歸梯矸山僧任真率
與物無忌猜香鉢覆雪黍茶鼎烹雷芰空中忽飛錫地上轟
擲杯好爵匪纓情積毀焉銷骸山水癖已成登眺力弗摧籟
書偶閒暇杖履歡追陪惟有琴鶴隨勿容車馬逐倏然定內
境聊以辭多哇豈將聖人道而與佛氏偕白日不肯住明月

卷三

漁石集

里

退補齋

還自來漸憐壯顏槁錯受浮名催驅車出山谷緬焉中遲徊
送石崗進萬壽表

三十慕君名參商違素期前年識君面繾綣情所希鷄飯訂
新歡轄靴聯佳輝愧匪南山蘭幸附西山芝分索易增感况
復清秋時皎皎明河流高林動涼颺征驂飼芻秣六轡光沃
而恭逢聖人壽親獻華封辭三祝應嵩呼萬舞調咸池君才
振風雅黃門舊拾遺當一切化理虛襟眷有思行矣畱禁闈
出入亮洪機山軀負宿痾慈母悞遠離愆然倦役俛焉思
言歸數畝已足耕一樽聊可揮良晤懼難續贈以青松枝

送王舜夫還朝

君處涓水磧我處越江湄高士憶南州元音邈子期未見意

已傾既見欣解頤千里愜良晤傾蓋如故知君詩我長歌我
酒君不辭連裾坐綠竹芳樹間黃鸝緣以道誼洽豈銅形骸
私僕夫倏在途征車亦已脂爰及松菊晨翩翩將何之王事
固有程星轅靡敢遲駕言登河梁天吹翻羅衣撼撼高葉鳴
暖暖涼露晞睠茲遠遊人故國縈遐思已爲別離苦今夕復
別離

壽頤庵菊水添籌啖桃摩狄蟠桃五章

南陽有元谷谷口山青青凡草不生殖靈菊綴其英黃綠準
天極素質含元精塗塗露爲液一瀉谷膠冷流芬冽苦井神
漿甘於錫淩波汲短綆泛月浮巨觥司空酌療眩太尉飲長
生持獻琅琊仙可以制頽齡菊水一歸虛洩巨洋瀾汗匯靈

卷三

漁石集

聖

退補齋

湫蒼漭扶桑出蓋藍蓬萊浮神仙宅其中石室波濤幽桑田
變無紀玉樞旋如流天地但逆旅古今亦蜉蝣推莢靜測景
斫樹頰添籌摩狄五百歲食桃三千秋積虛以成盈物理何
悠悠添籌二燦燦玉衡星隕落東海洋化爲蟠桃枝度索拱
其傍紫籀照珊瑚青柯戛扶桑根曲抱雲氣花明爛霞光千
歲一結實啖之溢天漿逃矣東方生倚樹曾三嘗先生桃源
人樹下長徜徉啖桃三采采若耶銅以爲長狄人丹精互西
極赤氣浮朱垠長安綠髮翁偶遇黃眉君並倚青玉杖揮手
摩其身適見鑄此物已近五百春靈曜燭不爛寒暑磨詎磷
淮渚牛終化晉苑駝亦榛至人稟靈德彼物奚足倫摩狄四
佳樹本靈物屈曲蟠坤維滄海沃其根崑崙摩其枝下有巨

鰲戴上有元鶴飛雲映花皎皎星燦實離離協氣九華合祥
光五色麗玉母招玉仙青鳥銜金泥飄飄馭閩風款款臨瑤
池願言樂且壽千歲以爲期

蟠桃五

南浦

縈回南浦曲停源清且漣鳧鷺白皜皜菱芡青田田洪橋曝
魚鬣急瀨揚蛟涎誰結隱者居黃茅蔭重簷枕石濯長纓臨
流張素絃野老互容與舉醕并擊鮮兀坐醉復醒醒已醉依
然何須問蓬海蓬海在人間

贈太微山人太微山人貧弗給于養才弗究其用故勉

之如此云

少年曳儒裾豪氣排西岷倚馬奮長筆颯颯風雲屯匣中寶

卷三

漁石集

器

退補齋

劍揮鴻鵠列其臆挾策步天府觀光應王賓出入戴星宿靴
鞅衝風塵浮生百歲爾胡乃常侏侏天烏息倦翻溪魴潛游
鱗薄言託沈痾歸與返吾真韋曲花木繁前居少陵人築室
臥其傍千載結比鄰曠達離世網睢盱傲炎門賦詩思若泉
市酒囊無緝藜藿僅充腸林莽將終身三釜尙缺養不仕聖
所嗔寒井溲弗汲有傷行道神荷篠固絕世捧檄喜爲親願
解東門冠弁沈北海樽就祿奉慈母宣力事明君哲人恆皇
皇勿云甘沈淪

送李拱元歸田

春月白如雪春山青如銅楊柳不堪折歸客何怱怱消息塊
元機哲人守虛沖三徑命巾車五湖漾孤蓬從茲謝塵鞅陶

然隱者風廣結桑麻交遠尋麋鹿踪洪淵縱文魴遙漢矯冥
鴻嗶彼風流子胡乃長書空

榮壽卷爲周宗化僉憲題

萋萋萱草花春曦明北堂番番遊子裾白雲儼太行蔚矣慈
母榮兒綰青銅章遐哉母之壽七十神安強兒遠母亦樂芬
澤流西方母樂兒長嘆修髓難親將榮陟三公階鼎食來穰
穰壽以百歲期藹藹桑榆光

關關圖

河水流泱泱河草青不黃關關水中鳥雌雄本自雙爰止不
相離于飛詎先翔詵詵被螽斯噦噦諧鳳凰

贈陳省齋赴召

卷三

漁石集

三

長補齋

鴈門風氣高君乘白馬來大函貫中條我遊亦壯哉白日設
君榻君到花常開共談桑梓春旨酒浮清壘越水何悠悠越
山高崔嵬君嗟我僕痛我吁君馬隕天子方明聖詎遺清廟
材皇華映周道修轡辭風埃高颺振君裾明月照我懷緬焉
長相思瞻仁還徘徊

送崦嵫山人巡視茶馬報成

五月天氣明雙旌度潼關驄馬振修鬣飲之黃河湍我有澄
清志寧知辭險艱肅轡歷漢河折入秦隴間風塵慘征衣冰
雪照容顏纖離羣如雲日照汗如雨匈奴捲營帳夜遁數千
里

長淮行送張員外還金陵

河上相見遲河下別何亟百草牽柔風孤峰駐落日長淮接
江水千里映空色旌旗耀文隼舟艦飛綵鷁丈夫意氣多中
流楫長擊

歌風臺

吁嗟秦不綱四方兵如雪霸王拔劍呼咸陽火三月燕趙旣
紛紛齊魯亦披裂沛上真人興猛士從如雲今日越略野明
日布披城桓桓胯下夫十萬兵橫行征伐息六國叱咤消陰
陵手持皇帝璽口噴山河盟狗以狡免設士緣敵國親狡免
死在野立見走狗烹敵國皆云亡猛士焉能存爾越今年醢
爾布明年擒雲夢信先縛渺渺空中塵百戰出百死胡弗得
一生乘輿過故宮父老褰衣迎班荆話桑麻舉酒椎鷄豚於
赫猛士氣激烈黃河瀆大風吼地來嗚咽嗚弗平黯淡天雲
飛歌發空悲辛誰人守四方自壞萬里城假令猛士在劉敬
免和親壇帳禮不撤何用呼北軍股肱永相保卓哉元首明
都咈音于于緬想重華君

送郭侍御歸朝

桓桓建玉節光照東海洋海底蛟鼉興涎沫流湯湯夙秉澄
清志攬轡中激昂激濁揚其清淮泗渫天漿明星出皎皎駕
言登河梁手持五色線歸補龍袞裳

鷺沙

溪沙平如湖燦燦白如雪上無颺颺宮下斷鼉鼉穴鷺鳥翔
且止淋滲秋水潔高格立金隄修喙喙瓊沫皎皎青溪人閑

卷三

漁石集

巽

退補齋

心離羈縻踰踰佩玉臣清標儼在列至道有妙用澤畔無長吟奮翮起盤渦乘風翥上林鷓鴣應淑氣鳳凰翔朝暎才如振鷺飛羽儀輝天門

送華子謝病

河流盪晴曦河草光陸離青春抱微疴還訪吳門醫船采赤石英斧斨青松枝所適會昭景聊以愜幽期嗟予五十餘猶未悟昨非惟悴病不已栖栖者何爲送子激中腸欲與行雲馳四時有定序進退妙元機子年今若何三十方揚眉况復抱利器樹績須及時松柏柱明堂靈鳳鳴于岐我爲天邊鳥暮矣已倦飛子爲磐上鴻行看振羽儀

贈張子錄刑

卷三

漁石集

七

退補齋

十月鴻鴈飛肅霜候初升總轡事行役山飈吹長纓莽莽東海墟孝婦寃猶騰父老噓嘻言今歲司刑平海水揚其清草木光敷榮鸞鳳出雲香蔚矣邦之楨

送筦湖年兄赴通政司參議任

時櫻桃花甚開

青陽照芳園櫻桃花如紈旨酒溢清壘開襟爲君歡君才本舟楫偃息射陽干射陽波浴洽盥濯歌考槃明聖御皇極賢士思彈冠壯歲頭正黑平生心常丹帝曰俞賢哉置之青雲端儀鳳下德輝振鷺肅修翰白馬行翩翩委珮鳴珊瑚逖矣勵令猷抗迹伊呂間

送呂子從質

杪秋淒以清郊墟生微涼手攜一束書綵鷁飛晴江長風引

行色繁雲結離腸天之生美材不易亦不數青松拔雲起藤
蔓不可縛免絲捲如虬琥珀明如虹矯矯明堂委棟柱隆其
中願言勤愛惜而以授良工送子青松行和以膝上琴綃帆
去渺渺明月照我庭

秋官盧子言別爲賦清河篇

昔日慕子名明月照我庭今日識子面清風披我襟美度金
玉相結佩儼周行清廟奏朱絃高岡鳴鳳凰風僕夫倏在門六
轡光裊裊良晤已云晏相別何太早酌之清河湍載歌清河
篇天際積雪曙草際明虹蟠願言重名德河水同澄鮮

送戶曹張子汝功還金陵

長江萬丈湍瀾汗接淮渚元窟潛蛟鼉芳岸映蘭芷去歲五

卷三

漁石集

哭

退補齋

月來綵鷁乘南風今歲五月還水際雲溶溶王事固有程江
淮來且往建業酒如飴堪以勞征軼

進士胡子進之剛直廉潔部內賢士今茲令蘭谿餞之
淮之水淮之澍而贈以詩用致期望之意云

混混蘭谿水婺星涵清光昔年民熙熙而今紛多瘡賁然賢
侯來閭閻喜洋洋草木倏生色鷄豚亦有春惠澤先困窮明
德植善人頑冥亦赤子可化不可嗔哀矜戚士師撫字勞陽
城已見侯之心心如溪水清願祝侯之政政如溪水平鸞鳳
暫栖棘鷓鴣終搏空三年頌聲成直徹五雲中

五言古詩續編

送門人秦子登同知鳳陽

昔年橋門中鼓篋從我游長風吹野萃鹿鳴聲呦呦而今頭
角殊民社才既優行矣理要郡修轡調且柔念彼凋瘵民我
手曾撫摩願言重德愛慎勿張頰苛但飲淮渦水一勺不可
多蔚起閭閻謠以嗣甘棠歌

送地官袁子伯昭督餉濟邊事竣報成

敵騎十五萬浮河肆助勦朝窺駱駝城暮跳石峽肆閱我貔
貅兵伐鼓登戰場曹官擁青蓋馳驅何傍傍旆警半夜烽劍
拂七月霜持籤較廩賡賦車屯芻糧我士飽而嬉我馬騰且
驤轉鬪一當百敵見心膽降鼠頭紛自竄螳臂詎敢攘安邊
先足食食足兵自強餉事聿告成行矣東方明青青垂楊道
織離縱柔韁手掬銀川湍爲子滌離觴

卷三

漁石集

吳

退補齋

廷獻翟子拜山西參政作甘棠篇

邊塞氣候殊四月雪如雨雄雉立紫駟寒雲結芳芑清晨發
蕭關玉轡光耳耳畫省風纖纖紫薇花蹀躞多種甘棠株根
與紫薇聯長言勿翦伐清蔭敷郊廛不解歌驪駒爲賦甘棠
篇

壽舅母鄭安人八旬

碩媛事君子結褵效于飛修祀薦及釜勸學截厥機閭則婉
而順眺魄望已幾宜室又宜家一唱與一隨八十允偕老白
首常齊眉琴瑟音于于桑榆景熙熙兒孫滿膝前皖彼蘭玉
輝明霞爛華觴祥颺颺斑衣我母七十六北堂藹春暉三壽
永作朋千歲以爲期

贈秦生時敵騎十萬壓境烽火方舉陝諸司有地方之責者皆驚怖按轡弗至秦生藩乃挾卷策蹇直冒險阻展候轅門高義可壯也因其旋贈之以詩

憶昔抱殘經從我橋門東澆瀆波瀾文美彼錦繡胸蒼鹿鳴
啣啣野苹生芄芄嘉賓式以興鼓瑟春風中而今十稔餘胡
乃弗顯融廣蹊祕桃李寒江淒芙蓉巷食客弗戚角歌聲何
雄我來理兵鈐屬有境上戎喜子勤問訊不避四野烽希音
竟空谷高義摩秋空獨立轅門雪安坐朔野風樽俎候興居
詞賦較拙工雖不識軍旅頗有文字功手攜南山蘭別我之
長安春雷起潛鱗青雲振羽翰大對呈琅玕芳籍屬春官

胡不歸二首

漁石集

卷三

辛

退補齋

晨起步芳園沆瀣淥我衣掬之不盈手吸之俛已晞遠岫飛
白雲嫩菊含朝暉睽茲遠游子母老胡不歸
秋氣日以高明月流素輝銀河朗如綃織女弄杼機蟋蟀鳴
堦除北鴈向南飛睽茲遠游子歲邁胡不歸

送郭行人一首

何處來足音披衣瞿然起寒露警飛節訪我轅門裏下榻洽
平生傾蓋許知己問我歲幾何我歲垂暮矣白髮紛照人劇
談輒搖齒秋菊花敷榮漬酒冽且清張筵爲君懽飲以雙巨
觥絳囊出瑤瑟鼓之風鏗鏗

贈汪白泉按察雲南

肅霜候初升鴻鴈鳴離離美人弭星軺顏色照芙蓉長探胸

南
中奇蔚矣經世略文章擅宗工鴻才佩青橐軎運天馬騰墨
滲海蛟躍雙谷發新劔青駟控金銜秦士鼓篋歌于嗟吾道

壽樊僉憲母

繫得萱草花而樹之北堂綠叢結絲蟠春風吹更長朱粧爛
明霞青陽照逾芳不比蒲柳質常映桑榆光

藹藹篇半洲蔡公膺簡命出鎮全廣而其大者尤在綏

定安南爾故作別言於安南事獨諄諄然不憚煩辭

云

藹藹金蘭情數年參與商凝睇北斗間山川糾且長燕鴈沈
清秋明月照我梁當亡眷遺直召之登巖廊共立鳳池頭鳴

卷三

漁石集

至

退補齋

珂音戛鏘鷄壇敦夙好牙籌激羽觴環瑰經營材啓處恒不
逞彼藐交之南逝矣麗職方酋王勢不競雄師方鳴張冠履
屬倒置兵文梗梯航庭實曠二紀譴責悖厥常天子赫斯怒
問罪師洗洗推轂艱若人毋踰蔡仲良特授司馬鉞兼縮中
丞章蒼隼耀綏旗紫駟控絲疆奮袂又長別張祖暉載揚行
戩最令圖朝野胥側耳華夷良攸關安危尤所倚河防決思
塞兵端啓思止千里餽猶饑況不啻千里綸巾服南人擒縱
吁嗟疥癬恙爬搔即可已刀圭施太武恐貽腹心痛藝樹豐
其根根挺柯葉起慎勿務繁枝重令本先靡直宣夷夏分峻
責君臣紀破彼強弱形燭以禍福理干羽格有苗包茅屈楚

子跋扈禡禍心雕題肅退軌中國尊如天南服安如砥垂衣
文德昭鼓腹蒼生喜虎略韜元機麟閣嗣徽美明烈策旂常
鴻名勒太史

贈侍御韓子鎮卿出判滁州

靈區材如林之子何瑰奇握蘭步初服昂霄奮襟期執簡柱
史臺天門翬羽儀鳳凰覽德輝噦噦鳴于岐謬誇危其言正
茲有道時封章出阜囊隨仗叩龍墀甚矣小臣慙銖鉞奚所
辭聖德天地容特垂雨露慈姑爾判江州一麾恩猶私滁水
漪且漣蛇蟻山環之濯纓與采芩游陟性所宜每飯不敢忘
萬壽遙致詞秋高天氣清重我雲水思持贈霜下英佩之光
陸離

思椿

卷三

漁石集

五

退補齋

瞻茲思椿篇哽咽弗忍披昔云一株老亦以千歲期胡遭霜
雪瘁而鮮雨露滋乃傷松柏性輒同桃李姿我父抗高義雖
貧不拾遺遇婢稠人中誤墮主婦斧提之金一橐簪珥光陸
離主婦慙朴婢婢號命已矣亟呼斧在斯還以貸婢死哭謝
更生恩如翁世有幾野航婦薄命姑怒不可回匍匐急相投
流離良可哀招姑返厥婦勸令消睽乖本無箕帚諱勿萌勃
谿猜姑喜酬以金老嫗何太小婦與金孰多舍多豈利少况
女數貫賞可以一家飽重義不重金視金猶視草德音何煇
煇手澤儼若存椿兮與化游思之情無言青雲發層枝九原
盤靈根善建特不拔作室肇美輪孝哉予仲氏父訓凜在手

還金感還笄存孤踵返婦繼志亦已臧貽謀敢云負蓼莪音
孔悲風木情獨久猶喜千歲萱祥光藹北堂共竭寸草心奉
以報青陽

胡道長鰲出按河東爲賦河水行

鷺車駕朱輪隼旗翬早羽直指三條陽汎彼河之水水兮流
泱泱鼓柁激且揚清兮瑩明質濁亦舒碧光迅瀾靡以馳砥
柱屹中央睠茲大夫志磊磊相激昂

西王母蟠桃圖爲友人六松子賦

金母現西極采采大冶英冲質萃至和靈化握元精紫霓以
爲裳寶笄綴繁星駕彼青鸞馭霄風泠泠仙子集霞裾共
泛瑤池觥緋桃媚珠盤珍異農黃驚玉衡散湘核磅磳發巨
萌蒼根偃虬次神枝蟠鯤溟三千年始花元冬葉長青實圓
大如斛流膠甘於錫赤棗竟奪采縹李難同馨六松頗好道
長揖東方生笑投盤中子啖之延修齡

嘉靖甲午之夏傅子國鼎以行人使出關西過予轅門

高誼奕然而別且年餘矣茲獲申良晤甚歡也傅子
尋拜侍御史建旆而南作憶昔行

憶昔馭軍和索居怒中腸使君擁輅蓋而亦之西方雙履結
青雲躋階相迎將雄飈發高歌流泉激清觴一別動經年悞
若參與商幸然並趨朝欣此後會良鷄班玉筍聯鷄壇白黍
香宦轍恆駢駢聚首固無常霜生白簡端手捧紀與綱秋高
厲鷹鷂日麗鳴鳳凰鷺車飾雕輪驄馬控絲韁弭節大江濱

澄清志激揚緬焉眷有思月色照我梁

禮部郎梅臺曾子蔚然有慕古之風與予爲忘年友日
者予出治邊梅臺送之詩義甚壯烈尋梅臺引疾還
別且六年又胥曾于京師朝夕過從懽甚而今梅臺
參議浙江于其行也以詩復之致厚望云

白璧重知己依稀如晨星與子締忘年臭味蘭斯馨昔我之
西方贈之以吳綾毫運風雨颯思麗雲霞蒸子亦抱微痾歸
採青原藥梁月空悠悠山川何糾錯每訊良晤期頃諾久要
約喜於日華東復申鷄壇樂人生萍水踪聚散常相因二月
布青陽俟照金章新淑旂發翩翩踏我武陵春桑梓動遙輝
竹馬清行塵芳郊肆綺筵揮陶然醉彈劍歌何雄怒焉傷

卷三

漁石集

蓄

退補齋

古意績衣足化民刻木不對吏閭閻縱作息熙熙飽厥儷世
僞日以滋太古日以漓法流設鈞距推司密繭絲譬如魚在
水層荷縱橫施又如烹小鮮徒以擾擾爲子誦先王法行哉
逖追古奉揚九天澤洒濯百姓苦縮賦蠲彼芟芻剪若虎
風翔鸞鳳祥惠濡梁肉補勿采赫赫赫赫聲虛隆亦勿嗤
政拙政拙心獨工植田頌子產化俗美文翁下土蔚于蕃華
錫侈彤弓

壽介所翁七秩

丈人抱奇節特與俗不諧少年挾策游比壯猶沈埋驟駟蹶
周行白璧誰沾哉五十走一職聊試叅謀材伺候五馬門何
如山間樂拂袖歸慈湖微名詎可縛野鶴翔青冥不受鷄鶩

唐高視宇宙窄長咳煙霞落黃眉垂修齡鼓缶音洋洋膝下
承歡顏孝哉柱史郎繡衣舞襜如絕勝斑斕裳列鼎養方來
熙熙壽而康

應臺行爲傅侍御賦

衡岳何迤邐沿湘九百里施芻千巖間應山轟然起蔚彼山
有臺秩秩臺有紀匪石星隕胚不峰齧斷趾境夷虛恬生氣
朗障礙被丹葩蕙容華容華難久恃麗草斂繁蕪繁蕪空靡
靡山靈呼卽喁谷神炯不死吁嗟大道隱歧路多亡羊大元
沈石閣南華墟蒙莊君子昂前修結廬山之陽踈櫺豁瞻靄
層軒挹景光浩露撫掌吸惠風披襟當非曰遺形骸而以馳
洗洋元居返太樸真悟超混茫妙趣泳以游天元發蒼蒼

卷三

漁石集

五

退補齋

細桃白鹿圖爲古潭道長賦

逸彼東海墟細桃實離離玉衡化元精度索蟠蚺螭開花三
千年結子亦如之一枚大十斛長啖流玉飴截截南山峰白
鹿生皎如質曜明月采毛揚白疊輝噓吸乳泉液嘖嘖瑤草
枝上下崑崙顛可代青牛騎至人與化游炳矣握元棊桃已
三過嘗顏丹沃芬滋盱目抗浮雲日抱白鹿嬉石室訪偃佺
聞風揖安期

雙泉吟

飛粵何巖崑靈竇竅且元蒼潏青煙杪一水深雙泉並瀉浩
露融相映繁霜鮮雲界潏脈分澗絡瀧痕連滄泓湛泮溼溼
川揚文漣縵設無盈虛孟漾隨方圓沃彼雲母精不灑蛟鼉

涎掬之洗我心清澈心冷然滓澄性真冽瀾派天光旋孺子
歌滄浪尼父亦在川臨流張素琴明激音相宣

送侍御史白坡何子領郡之吉州舟次蘭皋爲賦螺溪

吟螺溪吉之溪也

九月天氣高涼風吹絺帷之子停朱輪惠然慰我思抒衷布
綢繆屈指數別離三年一瞬疾一日三秋遲子顏燦瓊瑛老
我山林姿黃鷄釘雕盤白黍翻銀匙情長話靡窮景晏席屢
移朱輪復云駕軒軒何所如分符理劇郡戾止螺溪涯不張
五馬貴而以一鶴隨溪兮水長清子心清如之澄澹直徹底
可以表襟期長汲萬丈波一洗民痛瘼更溢九里潤枯槁生
光輝瀧靜鰓魚徙沙現鸚鵡飛名共潁川浩表拔三河奇

晴川爲時若思賦

卷三

漁石集

美

退補齋

元谷汎靈源一瀉千頃破積之成廣川源澆流瀾瀾浮雲斂
天末瞰瞰耿晴曦委照川之中掩映光沃而瑩質柔以明靚
紋朗且漪潛魚呷沖澹菁藻含華滋長瀾一片碧沫噴珠陸
離可泳亦可游而與棲遯宜空闊曠素襟虛舟縱所之揮觴
折芰荷雜佩采江蘿濯纓知者樂鼓柁騷人悲澹然機已忘
海鷗常依依沙磧飛落霞林杪曦夕霏薄暮正延地明月復
揚輝不寐汎牛渚倒載酣習池景澄興彌軼浩歌明月歸

憶昔吟酬張秋官石川子

憶昔長安游共聽金鷄曉夷猶風雨談繼繼詩書好言念高
堂親黑頭掛冠早翳翳景倏暮林泉音問杳陟岵望何極私

情感烏鳥且納毛義檄獨奏李密表駕言返衡宇長從膝下
老食藿百乘輕啜菽三公小我亦奉璽書建牙守四夷萍水
何悠悠雲樹空依依別離直太易轉睫十年期百年光若流
長消幾別離老馬疲長途倦鳥戀舊枝欣然解纓組歸以奉
母慈採筍幽倚石釣鮮清弄漪千里何綢繆而不忘故知投
我以華楫申之以妍詞金玉無遐心月露流清輝久甘老氏
默不問楊雄奇爲子發長吟風激音淒其匪曰報瓊瑤聊以
抒所思

贈適庵大夫得謝歸山中次包蒙泉韻

流光若波逝浮華亦荅榮所以達觀士游心泉石盟長揖謝
軒冕一笑捐公卿興言乞骸骨遄發返柴荆兒孫迭爲壽故
舊陳平生本安止足分竟完高尚名白雲不出山赤松風揚
清物理直洞觀四時序尤明紉蘭佩芳蕤采菊啜元英回楫
急流中不與滔滔并高岡迅振衣滄浪縱濯纓

林鳥吟爲葉節婦賦

吁嗟林中鳥依依生雙雛奄然失其偶比翼折且枯高巢松
柏巔歲寒心與俱不受繁霜侵常同明月孤形寂影相弔吮
咽聲猶號哺雛雛漸成雛矣毳羽毛大雛亦以隕小者飛翹
翹泣將返哺心而以報劬勞

冰檠吟

君子滌明德冰檠聲鏘鏘采采閭閻間百姓歌且揚冰寒性
獨徹煦煦生春陽檠味苦乃良可以比甘棠

送吳子幾之雷州幕府

子幾少年時豪氣薄牛斗儲胸錦繡蟠奮筆龍蛇走青紫何紛紛一笑不足有風翰困雲衢霜蹶蹶康莊貞哉斷織母白髮照高堂特捧毛義檄少解原憲貧斗米腰一屈寸草情長伸況有海上魚白白味可珍自昔烹釜樂絕勝椎牛悲直將一日養以報三春暉

龍津子知信州引疾言旋艤舟蘭皋過山中論舊誼椎

鷄炊黍浮觴而酌之爲賦如何吟四章

屈指數妙齡強仕維其期如何納履組而在黑頭時
蜚英迅羽翰宣力健精神絕無霜露恙如何辭採薪
拊民若嬰兒民亦呼母慈如何不長念閩閩借寇思

卷三

漁石集

五

退補齋

父老抱鞞留墮淚嗟嗟道方歎來已暮如何去復早

慶源堂爲松皋先生賦

冽彼伊洛源直引崑崙液丈人卜清隱編茅事游息一瓢顏
氏巷四壁原憲室分將五桂栽並取三槐植繁自返厥真荆
榛布階除纔爲東家宅又屬西家廬厥孫耿中懷俛仰先世
居偃偃慨遺簪眷眷還亡珠散金購舊業傷材結新構雙扉
肖葦門一堵宛圭竇燕雀去復來芝蘭萎還秀作善啓斯堂
餘慶蔭華胄美哉發源鴻流衍河洋洋袍笏浩恩波詩書手
澤長桂發竇郎叢槐騰王氏芳水木千年思春秋一瓣香

世芳樓爲松皋先生賦

靈區流檻泉清泚滲芳郊西衍十畝田負郭沃而膏老臣觸

巨璫投簪返林皋，卜築栖其間。高尚揚元標，音容逝云遠。歲
月徂何速，菊老陶潛逕。雲封子真谷，有子柱石材。孝哉踵遺
躅，繼秉太宰鈞。晉握中書軸，遺弓思善箕。作室務肯堂，涉園
撫光景。闢徑理榛荒，傑然構層樓。直接三台光，石兀平泉奇。
花聯綠野芳，黃河湧月瀾。太華拔雲峽，憑軒輒曠懷。登梯每
窮曉，田園興固劇。霖雨望應答，休耽北海樽。且掛東山榻。

送文岡黃門奉母還鄉詩

懿彼貞德母，誕育麒麟兒。警志苦嚙膽，勸學勤截機。激昂奮
青霄，佩囊官拾遺。花磚動風采，黃門肅羽儀。緬焉悵遠游，烏
鳥情欲飛。瞻雲慨何恃，叱歌靡依依。請攄倚門懷，勉就祿養
私。鳳驂來踟躕，蟻佩垂陸離。俯承膝下顏，仰接堂上詞。手捧

漁石集

堯

退補齋

卷三

五花誥，身著五色衣。匙翻白黍香，鼎滑赤鯉肥。春酒介眉壽，
長祝千歲期。偶沾寒暑恙，輒興桑梓思。母昔顧兒來，兒今送
母歸。直把寸草心，披瀝敷天墀。欣將母輿，御暫解王事。羈重
闈，開北堂。纒錦晃朝曦，親戚布情話。里閭騰光輝，方待補袞
功。又值行道時，母云兒勉旃。忠兮孝所移，韓子一表直。董生
三策奇，常把一寸丹。持以慰母慈。

送寤泉陸子令宣城

繫昔壯顏時，寤泉美少年。蒐獵羣書府，涵泳至理淵。摛文動
髦譽，萬選高青錢。通籍進士科，對策明光前。而今我耄矣，霜
毛颯華顛。寤泉躋強仕，氣邁凌風鳶。各懷行道心，聚首長安
中。本以桑梓緣，又結萍水踪。細雨話長連，明月樽不空。忘年

更忘形白頭與新同寤泉盤錯器出宰百里封皓雪激離觴
劍佩光如炯問我理人來肘懸已試方征科鮮善政惟有拙
乃良撫字莫憚勞我勞民汔康勿栽陶令柳灌漑邵伯棠勿
種河陽花樹藝潁川桑邑宰三公階會肅鶴鷺行

孝思篇爲董子千里題

此詩應編入五古

蘭陰有癯儒親喪但蔬粥三年懷抱中飲血已十斛食稻固
未安焉敢厭魚肉氣息僅一線形容卽稿木隣火逼苦廬倉
惶撫棺哭號天結陰雲踊地振林木靈飈倏回颺火光滅若
沃天道元且微孝思相感觸

七言古詩

棠陵寄至破屋歌爲和二首屋在雙馬莊巷窗曰見樹

卷三

漁石集

卒

退補齋

亭曰籠鶴皆棠陵自名

五月無雨暑氣溽六月雨多滄海漉美人新從沙河回買得
長安數椽屋劃然瓦壁忽以隕雨點鑿落雲氣沃可憐衾枕
冷如澆暫移見樹窗前宿蝦蟆朝出敗酒瓶鷄鴨晚集鄰家
木唐子聞之仰天嘆願助官中米十斛書生薄命古如此白
日且抱遺經讀幕天席地心不憂鷓鴣但求一枝足廣厦萬
間終塵土潘郎何處覓金谷

冥冥積雨滌煩溽煉石誰補天公漉白晝如瞑野如湖漁船
入市波穿屋方子新結籠鶴亭周遭花樹光沃沃靜夜楸宇
崩若雷亭破鶴上青天宿閑心一片不可招亭前惟餘舊栖
木平生無鶴飲不甘山婦空藏酒百斛蒼蒼月色照青帷還

取相鶴經來讀他日亭成鶴復來錦繼百丈繫其足何如同
載入山去開籠放之白雲谷

開先寺次陽明韻一首

鷄鳴起了官中事清閒騎馬看山寺纔過石橋僧出迎屢穿
松逕鶴不去白浦新從湖上來巖前對坐木樨開肺湯吸盡
龍池波共乘明月清歌回君不見淵明歸來日漉酒彼豪空
負印如斗太虛之上一點雲朝聚暮散倏無有

老僧苦修方外事焚香誦經不出寺巖上白雲招卽至巖下
蒼鹿逐不去青驄偶爲尋幽來松花寂寂山門開直上香爐
矚彭蠡大風滿面翻吹回彭蠡之水白於酒落星之臺大於
斗借問老僧何所歸直指天地無何有

卷三

漁石集

空

退補齋

見素公會宸濠反持佛朗機遺陽明公以助軍威陽明
公壯其忠義歌詠之爲和此

佛朗機公所爲一聲震起壯士膽兩聲擊碎鴟臣皮三聲烈
焰燒赤壁四聲靈耀奔燕師五聲颯颯湖水立六聲七聲號
號風霆披浪鐵椎響尙父白旄麾白首丹心今在茲佛朗
機公所爲

明妃篇

并引

漁石子訪午谷子午谷子出明妃圖以觀漁石子漁
石子曰惡觀乎是夷狄之熾中國之衰君政之否女
德之辱也惡觀乎是雖然有鑒之理焉元帝德衰后
宮色盛諸美人競輦金帛以售畫工圖朝入夕召矣

如獨恃其美豔迄弗施賂而畫工蔽之乃寢見掖庭
出嫁異域人至于今悲焉抑讒夫憮人之賢猶
夫是也是故屈原匡楚上官間其直子胥彊吳宰嚭
疎其忠汨羅自沈楚隨之削屬鏤賜死吳亦以亡是
可以鑒矣乃歌曰

美人如花還如雲自恃弗肯拋黃金畫工怪不施丹青空有
顏色傾人城單于書至強索婚美人以圖屬當行天子見之
光鑑人欲畱又懼單于嗔流淚擁出昭陽門琵琶馬上嗚嗚
鳴康瓠朝飲天馬酪毳被夜宿窟廬水強將一死委青草可
憐萬古汗黃塵吁嗟不獨畫工爾自古讒儉皆如此上官鼓
舌三閭沈宰嚭游辭子胥死天生尤物國之魔蔽人之貌猶
足多方正倒植天地塞蔽人之賢將奈何

卷三

漁石集

空

退補齋

兩厓行贈朱侍御廷立次崆峒韻

洞庭之野雄峰巒上有九疑連衡山兩厓矗矗拔飛巘芙蓉
削出於其間大鵬颺翼鰲負趾丹壁隱現青冥裏仙子併力
負得來神人舞智鞭不起表儀已見擎日月宣化慣歷磨陰
陽布澤時能出雲雨作鎮還堪爲紀綱內伏丹砂爛霞綺外
敷雲母明秋霜培塿偃伏松柏下蓬萊照映雲水鄉侍御事
業期不朽躋予兩厓真相當兩厓截比南山石千仞萬仞高
崑崙直如琅玕端如笏丰采巖巖柱下立

去年九月秋往廣陵時戶曹楊子益夫來謁舟行急乃
弗相值怏怏不已而今五月楊子督漕至仍會于廣

陵舟中奇矣于其別也詩以贈之

戊子之秋江上行君乘短舫來將迎風檣如馬不可停蒼煙
白水空有情五月菖蒲匝江綠仍到江上采民俗雲津倏停
使者車細雨長談照明燭周道透遲蕭采齊胸中煥爛羅珠
璣昔日此地不相見今日卻恨相見遲相見何遲別何亟江
蘼河柳映秋色十萬漕艘一呼吸

卷三

漁石集

三

退補齋

08054

